

弘簡錄

百一之三


宋



			五	漢
		一	一	書
		四	〇	門
		八	六	
九	三	四	八	
冊	架	函	號	類

庫文閣内			
三	五		漢
函	一		書
一	九		
三	〇		
架	六		
	冊	號	類

内閣文庫	
番號	漢 5106
冊數	93 (35)
函號	286 83



弘簡錄卷一百之一

明刑部員外郎仁和弘齋邵經邦學

皇清翰林院侍講學士四世孫遠平校閱

宰輔 宋二之三

王旦 父祐子素孫華靖曾孫古震兄懿弟旭旭子質

王欽若 丁謂 附林特 陳堯叟 父省華弟堯

馮拯 子行已 仲已 曹利用 夏竦 父承皓 子安期

王旦字子明大名府莘縣人曾祖言唐黎陽令祖徹後唐進士官左拾遺父祐字景叔篤志詞學性澗儻有雋氣晉天福中以文謁桑維翰名聞京師辟鄴帥杜重威觀察支使時漢祖移鎮睢陽重威心懷反側祐勸以必無反漢仕周令魏縣南樂入宋拜監察御史知光州乾德三年擢知制誥六年加集賢修撰改

知潞州饋餉無乏朝議符彥卿鎮大名有異志令祐代之兼伺
察動靜祐舉百口明其無他願以五代之君猜忌誅殺爲戒由
是獲免擢兵部侍郎知貢舉簡拔寒俊畢士安柴成務皆其所
取虛多遜傾趙普累諷祐比已祐不從舉宇文融排張說事勸
令釋憾多遜不悅後果敗人服其先見生三子懿旦旭世多稱
其陰德祐手植三槐於庭志曰後世必有爲三公者卒年六十
四旦自幼沉默好學爲第任大理評事知平江有善政遷將作
監丞運使趙昌言妻以女代還監潭州銀場何承矩薦爲著作
佐郎預編文苑英華遷殿中丞通判鄭州請建常平塞兼并之
路淳化初王禹偁又薦獻文召試命直史館拜右正言知制誥
不十年繼父任時論榮之明年同知貢舉加虞部員外郎同判
流內銓兼知考課院避趙昌言參政改禮部郎中充集賢修撰
罷後仍判院事賜金紫至道初知理檢院進兵部郎中真宗卽
位拜中書舍人翰林學士兼知審官院通進銀臺封駁司帝素
賢旦嘗因奏事目送之曰爲朕致太平者斯人也同列錢若水
有人偷鑿每曰王君凌霄聳梁棟之材貴不可涯李沆亦推
重之咸平三年復知貢舉拜給事中同知樞密院事踰年以工
部侍郎參知政事從幸澶州值雍王元份暴疾命馳還代權留
守奏宣寇準臣有所陳準至旦曰十日之間未聞捷報當如何
帝默然良久曰立皇太子旣至直入禁中號令嚴肅駕還家人
尙未知反迎於郊加尙書右丞拜工部尙書同中書門下平章
事集賢殿大學士監修國史帝納王欽若之說謂自古以來希
世絕倫之事必得天瑞然後爲可帝曰天瑞安可必得欽若曰
前代蓋有以人力爲之者惟人主深信而崇奉之以明示天下

則與自天者無異也。帝沉思久之曰：王旦得無不可欽？若請乘間諭以聖意，旦勉從之。因名飲歡甚，賜以尊酒，曰：歸與妻孥共之。既歸，發視皆美珠也。由是天書封禪等事不復異議。祥符初，爲天書儀仗使，封泰山爲大禮。使進中書侍郎、撰封禪頌、祀汾陰，并謁太清宮，奉聖像，皆爲大禮。使遷右僕射，昭文館大學士，仍撰祠壇頌，加功臣，俄兼門下侍郎、玉清昭應宮使、景靈宮建，爲朝修使，兼天書刻玉使，遷賜御廐三馬，昭應宮成，拜司空。以慘恤不赴京師，酺宴賜詩，導意旦柄用。凡十八年，爲相踰一紀。遇契丹修和，西夏守誓約，天下宴然，務守祖宗之法，力行故事，慎所變改。帝久益信任之，其與人寡言笑，默坐終日，每羣臣論事，異同一言，徐定歸家，或不去冠帶，靜室獨坐，家人莫敢窺。歲蝗，帝使人於野得死者，以示執政，衆欲稱賀，旦持不可。一日，方

奏事，飛蝗蔽天，帝顧曰：使當賀如此，豈不爲天下笑耶？宮禁災，帝方歎兩朝所積一朝殆盡，令根究所起，坐罪。旦對曰：陛下富有天下，財帛不足憂，所憂者宗廟社稷。天災如此，臣備位宰相，首當罷免。因上表待罪，帝亦降詔罪已。坐者獲免。有日者妄言宮禁事，帝怒，誅籍其家。因得朝士占問吉凶之說，帝怒欲付御史問狀。旦曰：此人情之常，語又不及朝廷不足深罪。因自取常所占問書進，曰：臣少賤時不免爲此，必以爲罪，願并臣付獄。帝意解。旦至中書，悉焚所得書。既而帝中悔，復命馳取。旦曰：臣已焚之矣。由是皆免。論德張士遜等言：太子學書有法，艱然曰：諭德之職止於是耶？且太子不應選舉學士不在攻書敦勉於道，德可也。時東封，近車駕將出，契丹奏請歲給外，別假錢幣，問何以答。旦曰：彼故以此探朝廷耳，止當以微物輕之，許於歲給內

各借三萬仍論次年額內除之契丹得之大慙西夏饑求糧百萬斛大臣皆欲不許帝以問旦請救有司具粟百萬於京師令自來取德明得詔慚且拜曰朝廷有人素與寇準善數稱之帝問準何屢毀卿謝曰臣在位久闕失必多準無所隱益見其直此臣所以重之帝以是愈賢旦會有事送審院違詔格準撫以聞旦被責堂吏皆罰頃之準有事送中書亦違詔格堂吏欣然呈之旦令送還準大慙曰同年安得許大度量準罷託求使相旦陽拒之曰將相豈可求耶已而除準武勝軍節度使同平章事入謝帝具道之準媿歎爲不可及後有奏準在鎮遇生辰造山棚大宴服用僭侈帝怒謂準每事效朕旦徐對曰準誠賢無如駿何帝意忽平陳彭年呈政府科場條目旦投之地曰內翰得官幾日乃欲隔絕天下士耶皇恐而退敏中又出彭年所上

文字旦命取紙封之曰其意不過欲圖進爾後彭年參政與王曾張知白言旦每曰奏事其間有不經上覽者輒批旨行之留身欲奏帝驚曰有何事不與旦俱旦在左右多年朕察之無毫髮私特諭以小事一面施行卿等謹奉之皆媿而退旦畧不介意謝曰正賴諸公規益帝欲相欽若旦曰欽若遭逢陛下恩禮已隆但祖宗朝未有南人當國者沒後欽若始大用語人曰爲王子明遲我十年作宰相欽若常與陳堯叟馬知節奏事忿爭帝大怒命付獄旦從容奏曰願且還內來日取旨明日旦言欽若等不知當坐何罪帝曰忿爭無禮旦曰以陛下尊臨廣覆外人聞此恐損觀聽不如名欽若等宣示陛下含容之意且戒約之俟少間加罪未晚上謂非卿言朕固難忍又與楊億評論人物至丁謂曰才則才矣使當大位必有德者助之庶幾終吉若

令獨任必爲身累後果如其言與內侍周懷政同爲兗州景靈
宮使每請見旦必俟從官盡至見於堂皇白事而退後懷政以
事敗人服其遠慮內臣劉承規求爲節度帝曰承規待此以贖
旦不可曰他日將有求爲樞密使者奈何自是官不過留後每
日謁客嘗滿無敢以私請察可與言及素知名者籍記之遇有
差除密疏姓名以請用者帝密點之同列互有所擬輒不許以
是外人不知沒後始得其由故參政李穆子惟簡家居有賢行
薦爲太子中允及議知制誥大臣皆屬諫議張師德旦惟言師
德可惜向敏中問故答曰累於上前言師德名家子有士行不
意爾及吾門狀元及第榮進素定但當靜以待之若復奔競使
無階而入者當如何也或言恐有人譖毀之者答曰旦處安得
有此但師德待我薄爾敏中固爲而旦曰第緩之使知者即以

爲戒朝議知許州石普不法欲就劾治旦言普武人恐妄有生
事不若名歸置獄既不屈法亦賴保全國體時論多之對江淮
發運薛奎張士遜無他言但云東南民力已竭朝廷權利已至
奎歎曰真宰相之言也士遜因而自損人稱得體張詠成都還
代以任中正謂非是人不能守詠之規言者輒止或遇有謗引
咎不辯至人有過雖觸盛怒必辯而後已素多羸疾乞謝政優
詔不許繼以面諭天禧初進位太保尋加太尉兼侍中五日一
赴中書遇軍國重事不限時日入預參決帝敦重委託至命皇
太子出拜旦惶恐走避太子隨而拜之具言太子盛德福裕宗
社因薦輔佐十餘人後惟李及凌策不至相位帝觀其形瘁懇
求避位憫然許之故事改兼使相獨仍太尉專領玉清昭應宮
使給半奉辭日命肩輿入令其子國子博士雍贊善大夫冲扶

見於延和殿帝問有不諱天下事付之誰乎對曰知臣莫若君
惟明主擇焉帝令強以已意舉笏曰莫如寇準遂退日遣內侍
候問手自和藥并著蕈粥賜之延所厚楊億撰遺表願日親庶
政進用賢士戒子弟務儉素保守門風不得事泰侈上覽奏歎
息親幸臨視賜白金懇辭遂薨年六十一復臨哭之慟免朝贈
太師尚書令魏國公自東封後每有大禮輒奉天書以行恒悒
悒不樂臨終戒諸子謂我別無過惟不諫此一事欲自黜爵慎
毋厚葬合削髮披緇以斂楊億以爲不可乃止子弟姪外孫門
客常從授官者十數人服除又進諸子一官有文集二十卷乾
興初配享真宗廟庭仁宗篆神道全德元老之碑生平事寡嫂
有禮與弟篤友愛婚姻不求門閥被服質素止於所賜弟呈玉
帶有佳者耶之曰自負重而使觀者稱好無乃勞乎或欲以繪

錦飾氍毹亦不許平居未嘗見其喜怒遇食飲不精但不食而
已終其身不置田宅上欲治其居力辭而止子素字仲儀登
進士爲屯田員外郎孔道輔薦爲御史仁宗擢知諫院方年壯
遇事感發時西夏叛盟契丹要求嘗欲省中外無名之費會皇
子生將進百僚官加諸軍賞素言願留爵秩以賞戰功儲金繒
以佐邊費京師旱命扈從詣西太一宮日甚熾埃氛翳空比駕
還大雨雷電論王德用進二女諭曰女已事朕左右素言臣憂
正在此帝動容遣出仍賜銀緋擢天章閣待制新置按察使以
素領淮南時奉使者類多以苛爲明素獨不撻紉故惟繩治其
貪刻改知渭州遷龍圖閣直學士原州蔣偕議築大蟲堡敵伺
間要擊偕懼來歸素不之罪使罪力自効狄青以爲不可素曰
偕不可遣則總管總管不可素即行矣青不敢復言卒城而還

轉樞密直學士知開封至和秋大雨蔡河裂詔軍吏障朱雀門
時仁宗不豫衆心忤忤素恐塞門動衆不奉詔水亦無害出知
定州移成都裁牙校歲輸酒坊錢以供厨傳罷鑄鐵錢以權物
價凡爲政務合人情蜀人紀其政跡號王公異斷復知開封移
許州治平初夏人寇靜邊砦召拜端明殿學士復知渭州比至
敵解去拓渭西南城濬陘三周積粟支十年屬老來獻土爲築
八堡使居散耕田里有警則聚增募弓箭手行陳出入之法身
自督訓士氣感奮他道莫及換澶州觀察使知成德軍改青州
熙寧初知太原汾河溢亟具舟楫築堤捍之人賴以安入知通
進銀臺司轉工部尙書致仕卒年六十七諡曰懿敏 孫鞏歷
宗正丞有雋才長於詩從蘇軾游 靖字詹叔蚤孤力學好講
切天下利害以祖蔭歷通判闔州知滁州主管北京御史臺言

契丹數遣使多挾虛聲以濟其欲宜有以折之又請復明經科
加試貢士策以觀其所學稍變聲律之習擢利路運判提點陝
西刑獄立鄉戶役法一以歲月遣代吏不得權其進速因著爲
令徙河東訊驗殺人罪囚折服其心遷開封推官曹濮盜久不
獲由大姓龔彙靖至擒獲十八九請并坐之徙廣南轉運使交
趾且至神宗謂王靖在彼可無念卽拜太常少卿直昭文館知
廣州居二年入爲度支副使卒 曾孫古字敏仲第進士熙寧
中爲司農主簿賑淮浙旱菑張若濟獄劾轉運王廷老張靚
失職皆罷之連提舉四路常平爲太常博士加上仁英三廟諡
并升祔四后初議不發册古言祔廟之禮必由册而後顯旣云
升祔禮不可闕乃詔用竹册又定諸神祠封額爵號之序出爲
湖南運判提點淮東刑獄歷工吏二部右司員外郎太府少卿

奉使契丹紹聖初遷戶部侍郎詳定役法從司馬光與蔡京不合徙兵部以集賢殿修撰爲江淮發運使進寶文閣待制知廣州遷直學士知成都入黨籍責衡州別駕安置溫州復朝散郎卒震字子發以蔭銓試優等賜第上諸路學制神宗稱其才以爲檢正中書刑房公事預修條例加館閣校勘檢正孔目吏房元豐官制行與吳雍從輔臣執筆入記上語而授右司員外郎使自書除日舉朝榮之兼修市易救帝諭以朝廷造法皆本先王之制推行非人故不能善後且貧民旣不能償宜計其負悉捐之輒籍其家豈善政也震頓首奉詔進起居舍人行西邊還爲中書舍人元祐初遷給事中出知蔡州更歷五郡紹聖初權吏部尚書拜龍圖閣直學士知開封奏獄空徙樞密都承旨哲宗疑不實坐奪職知岳州卒兄懿字文德勵志爲學登進

士嘗知袁州有政績卒年四十九子睦弟旭字仲明嚴於治內恕以接物尤篤友義以蔭補太祝知緱氏縣嚴於自守民有承寧三饗緱氏一鎌之謠真宗尹京素聞其能及踐阼三遷至殿中丞引嫌不仕王矩薦其材堪治劇土名且面諭前代弟兄同居要地多矣豈以卿故屈之耶命授京府推官固辭改判南曹由國子監丞出知潁州歿歷中外早有政績擢兵部郎中知應天府卒年六十八子質字子野少淳謹力學師事楊億歎爲英妙且亦嗟賞之蔭補奉禮郎登進士歷館閣校勘集賢校理祠部員外郎終父憂通判蘓州守黃宗旦年少易之得盜鑄錢者以術鉤致之喜見於色質歎以爲仁者之政不當如是宗旦慙謝爲薄其罪還判尚書刑部吏部南曹知蔡州毀吳元濟廟更祀狄仁傑李愬號爲雙廟改壽廬二州遷度支郎中徙荆

湖北路運使加史館修撰同判吏部流內銓擢天章閣待制出知陝州卒為人克己好善自奉簡素如寒士范仲淹貶饒州載酒往餞願為其黨世以此益賢之

冊曰嗟彼槐翁受賄曲從志慚論道不以正終有贈無諡

方顯至公

削去文正舊諡故云茶卡亦然

王欽若字定國臨江新喻人祖郁官鄂州生欽若之夕若有光景父仲華早卒郁撫之年十八太宗征太原作平晉賦獻行在擢進士調亳州防禦推官遷秘書郎監廬州稅改太常丞判三司理欠憑由司時坊賓古為判官常言天下逋負自五代迄今理督未已民以為病將啓蠲之欽若攘為已善命吏一夕句校成數上於真宗驚曰先帝顧不知耶對曰先帝知之殆留陛下使收人心爾即日放遣錢穀千餘萬囚繫三千餘人因是器重

名試學士院拜右正言知制誥尋為翰林學士蜀寇王均平分安撫西川所至訊繫囚死罪以下遞降之凡列便宜多所施行還授左諫議大夫參知政事郊恩加給事中知貢舉嘗臨津人任懿登科事覺駕禍洪湛得免景德初契丹入寇命為兵部侍郎判天雄軍提舉河北轉運事帝親宴遣之在鎮束手無策還日累表求解罷為刑部侍郎尋判尚書都省修冊府元龜凡帝所褒贊必自名表首以謝即有繆誤當譴問預戒書吏但云楊億以下其險詐多此類也歲中復除資政殿學士寇準定其班在翰林學士下欽若自訴於帝加大字得班承旨上因進譖語帝遂踈準欽若又言必欲滌城下之恥以兵取幽燕乃可帝曰河朔生靈始免兵革朕安忍為此可思其次對曰若是則惟有封禪可以誇示今古鎮服華彝帝心悅之命判兗州矯言景德

四年六月甲午木工董祚於醴泉亭北見有黃素曳草上字不能識皇城吏王居正覽其上有御名以告欽若特具威儀奉導至社首跪授中使馳奉以進上至含芳園奉迎明日召百僚出所上天書并祥瑞圖以示欽若又言至嶽下夢神人願增壇宇後至威雄將軍祠其像如夢中所見請構亭祠中朝議以爲假設之詞帝信之不疑改元大中祥符封禪禮成遷禮部尚書判禮儀院獻社首頌轉戶部尚書從祀汾陰爲天書儀衛副使明年拜樞密使檢校太傅同中書門下平章事聖祖降加檢校太尉謁太清宮爲禮儀使自言居第在太廟後孺出入訶導不安易賜官第於定安坊七年同知天書刻玉使與馬知節素不相能因爭瀘州都巡檢王懷信等平蠻功次久不決知節面詆其短罷爲吏部尚書奉朝請俄復如故玉皇上尊號遷右僕射爲

會靈觀使有龜蛇見拱聖營除其地建祥源觀復總領之天禧元年拜左僕射兼中書侍郎景靈宮使闕道藏得趙氏神仙事迹四十人於廊廡適捕商州道士譙文易私畜禁書能以術使六丁神言嘗出入欽若家得所遺詩問訊不服帝怒除太子太保出判杭州皇太子以東宮師請歸復資政殿大學士日赴資善堂侍讀進檢校司空尋授山南道節度使同平章事判河南與丁謂不協托疾就醫未報輿歸謂詰以擅去官守命中丞薛映按問惶恐伏罪降司農卿分司南京奪子從益一官仁宗起爲太常卿以刑部尚書知江寧府仁宗常宮中爲飛白書適欽若奏至遂大書王欽若三字會太后欲再相欽若卽以字緘置湯藥合中遣中人齎賜口宣名之至國門人尙未知旣朝復拜司空門下侍郎同平章事監修國史實錄成進司徒郊恩

封冀國公兼譯經使始赴傳法院感疾卒贈太師中書令錄親屬及所親信二十餘人國朝卹恩未有比者欽若少時嘗夜起視天中有赤文成紫微字後使蜀至褒城道中遇異人告以位至宰輔既去視其刺有裴度字及貴遂好神仙之事表修度祠官其裔孫撰文以紀益闡彌文禮儀請躬謁元德皇太后別廟爲莊穆皇后行期服議者謂天子絕傍碁所言不合禮置先蠶并壽星祠升天皇北極帝坐於郊壇第一龕增執法孫星位別制王公以下車輅鼓吹以備拜官婚葬所著有鹵簿記彤管懿範寶文統錄天書儀制聖祖事跡先天記翊聖真君傳五嶽廣聞記列宿萬靈朝真圖羅天大醮儀自以深達道教多所建明領校道書凡增六百餘卷生平智數過人能委曲遷就以中帝意加之傾巧敢爲妄誕人斥其矯帝不之信狀貌短小兼項有

附疣時目爲瘦相後仁宗對王曾言觀其所爲真姦邪也與丁謂林特陳彭年劉承珪始終朋比時號五鬼後嗣竟絕

丁謂字謂之一字公言蘓之長洲人後寓洛陽父顯與竇偁同官涇州時謂方幼一見稱爲遠到之器遂妻以女既長與孫何友善以文謁王禹偁大爲賞鑒登進士爲大理評事通判饒州遇異人曰君貌類李贊皇至爲官贊皇不及踰年直史館遷太子中允福建採訪使還上茶鹽利害擢轉運使除三司戶部判官體量峽路蠻擾邊還奏稱旨累遷工部員外郎領夔峽路轉運施黔高溪土兵初捍王均有功旣而爲寇召其種酋宣諭朝廷德意赦而不殺復聽以粟易鹽酋大感泣願世奉琛貢於境上刻石作誓民免屯戍兵得資給轉刑部員外賜白金有溪蠻別種爲寇卽遣高溪酋討擊擒之并得所掠漢口蠻族復多善

馬請置館黔南歲給緡帛收市凡居五年徙置夔州城砦皆所
經畫入權三司鹽鐵副使未幾擢知制誥判吏部流內銓帝幸
澶淵出知鄆州兼齊濮安撫使提舉轉運兵馬巡檢等事契丹
深入民驚擾爭趣楊劉渡謂督舟人速濟仍立部分司並河執
旗幟擊刁斗呼聲聞百餘里契丹引去名爲右諫議大夫朝陵
爲隨駕三司使稽查景德四年民賦戶口之籍較咸平六年之
數爲會計錄具上史館請自今歲較額數以聞詔獎之擢權三
司使加樞密直學士會議封禪帝問及經費謂對大計有餘議
乃決卽授計度糧草使又議卽宮城乾地營玉清昭應宮羣臣
多諫沮者帝召問謂請諭以皇上富有天下建一宮以奉上帝
且祈皇嗣王旦有密疏帝如所諭告之不敢復言卽領提督玉
清昭應宮及天書扶持使遷給事中真拜三司使祀汾陰兼行
在三司復總領建會靈觀欽若薦除叅知政事建安軍鑄玉皇
像命充奉迎使朝謁太清宮復充奉祀經度制置使權管勾駕
前兵馬獻白鹿并靈芝九萬五千本還判禮儀院領景靈宮重
修使摹寫天書刻玉笈并天書儀衛皆爲副使大內火爲修葺
使九年兼新置會靈觀使天禧初拜平江軍節度使知昇州徙
節保信軍三年復叅政事檢校太尉兼樞密使與寇準不協夜
微服乘犢車詣曹利用計事媒蘖其過罷之拜同中書門下平
章事昭文館大學士監修國史周懷政敗帝欲謫準江淮間謂
特除道州司馬凡與準善者悉逐之同列不敢言王曾以帝語
質之恚曰居停主人勿復言蓋指曾以第舍假準也會二府兼
東宮官李廸先兼太子少傅故令兼尙書左丞以抑之因致大
詬廸與謂並罷謂以戶部尙書知河南入謝懇乞復留帝詰所

爭狀對曰非臣敢較乃廸忿詈臣爾命賜坐左右欲設墩謂顧
曰有旨復平章更以机進卽入中書視事如故仍進左僕射門
下侍郎兼太子少師天章閣成拜司空乾興元年封晉國公仁
宗卽位再進司徒兼中書侍郎議免月進錢充宮掖之用太后
深惡之謂潛結內侍雷允恭密換后手書降出欲獨任不與同
列預聞機政凡軍國事允恭傳旨付學士草制示謂閱訖乃進
會除謂山陵使允恭爲都監倚勢益橫無所忌憚與判司天監
邢中和擅易皇堂地衆議喧騰謂庇允恭依違不決詔王曾馮
拯曹利用等覆視咸云應用舊地遂誅允恭後數日太后與帝
坐承明殿詰問謂爲宰輔交通宦官瑩陵大事擅有變易因出
謂所託後苑匠造酒器及允恭求管勾皇城司并三司衙司狀
言謂與允恭前所奏事皆言借卿等議定故皆可之拯等奏曰

自先帝登遐政事皆二人同議稱得中旨臣等莫辨虛實賴聖
神察其姦此宗社之福也論罪降太子少保分司西京仍榜朝
堂頒諭天下追其子琪瑀玘琦等官又坐與允恭協謀引女巫
劉德妙入禁中妖言惑亂貶崖州司戶參軍籍其家得四方賂
遺不可勝紀其弟誦說諫悉降黜自叅政任中正而下罷者又
十數人在貶所專事浮屠因果之說致書洛守劉曄祈保其家
曄得書以聞帝見之感惻得徙雷州內移道州明道中死於光
州謂爲人機敏有謀兼以儉狡過人文字累數千言一覽成誦
三司案牘吏久難解者一言判之尤善談笑工爲詩至圖畫博
奕音律無不洞曉每休沐賓客滿座令盡陳之聽人自便而從
容應接於其間莫能出其意者初議營昭應宮料功須二十五
年謂令以夜繼晝每一匠給二燭七年遂成林特字士奇祖

揆仕闕爲任昌令因家南劔少穎悟十歲以文謁江南李景獻
奇之江南平除長葛尉改遂州錄事參軍授大理寺丞遷判隴
州有治狀田重進鎮永興遷爲通判賜白金會討李繼遷督所
部芻粟先期以辦呂蒙正薦爲西京留守通判入判三司戶部
勾院梁鼎制置陝西青白鹽前後上議異同命與知永興張詠
同商利害所奏合旨累遷戶部兼鹽鐵副使始得赴內朝上北
征命同知留司三司公事俄與劉珪李溥比較江淮茶法因
裁定新制歲增課百餘萬車駕謁陵并封泰山祀汾陰祀太清
並爲行在三司副使計度糧草禮成進給事中以右諫議大夫
權三司使兼領玉清昭應景靈宮太極觀副使宮成真拜三司
使寇準言特姦邪又數與爭事帝爲出準特在職如故天禧元
年爲修上聖祖寶冊副使時天下完富特以有心計天性邪險

善附會得專幹財利仁宗在東宮兼太子賓客改詹事司謂欲
引爲樞密副使李廸不可謂貶遂落職知許州遷判尚書都省
勾當三班院體素羸弱然惟恐失之未嘗一日謁告及得疾纔
五日而卒贈尚書左僕射爲人精敏喜吏職據案終日不倦真
宗訪以大事陰有所中傷人以此憚之奉詔撰會計錄三十卷
又爲東封西祀朝謁太清宮慶賜總例三十六卷子維亦有吏
能歷官三司鹽鐵副使洙官至司農卿知壽州臨事苟急人擊
殺之陳彭年字永年撫州南城人鹿邑令省躬之子幼好學
年十三著皇綱論萬餘言師事江南徐鉉爲名輩所賞頗負雋
名然桃薄好嘲咏爲宋白所黜雍熙二年始中第調江陵司理
參軍換生簿歷禮懷澤三州推官王化基薦其才改衛尉丞遷
秘書郎大理寺詳斷官坐事出監湖州鹽稅尋以喪免家貧賴

僕備取以濟喬惟岳累表為游蘇壽三州通判咸平三年上疏
置諫官擇法吏簡格令省冗員行公舉凡五事名試學士院遷
秘書丞知金州景德初代還直秘閣杜鎬刁衍薦其該博命直
史館兼崇文院檢討同修起居注賜緋魚預修冊府元龜遷右
正言充龍圖閣待制賜金紫與侍御史賈鄴數建白彈劾上令
中書籍記加刑部員外郎同知貢舉請詳定考試條式命與臧
綸參定多革舊制專務防閑所取不擇文行止較一日之藝雖
杜絕請託然中者多非宿名之士議建封禪預詳定儀注禮
成進工兵二部郎中集賢修撰改龍圖閣直學士遷右諫議大
夫兼秘書監諡編次太宗御集賜勳上柱國六年召為翰林學
士同修國史謁太清宮為經度制置副使兼判亳州又同知禮
儀院禮成加給事中天書儀衛并刻玉副使遷工部侍郎俄轉
刑部侍郎參知政事充會靈觀使參詳儀制奉寶冊等使侍真
宗朝天書將詣太廟退就中書閣中眩仆卒年五十七上親臨
涕泗廢朝贈右僕射諡文僖錄子佺期大理寺丞孫彥先奉禮
郎為人敏給博聞強記慕唐四子為文體制繁靡貴至通顯奉
養無異貧約所得奉賜惟市書籍以附欽若丁謂士論鄙之朝
廷典禮無不參預時政大小日有諮訪應答該辨一無凝滯務
與帝意諧合及升內閣事務叢脞形神皆耗舉止失措家人有
不記其名者奉詔同編景德朝陵地里封禪汾陰三記閣門客
省御史臺儀制及宸章集歷代婦人文集所著文集百卷唐記
四十卷

陳堯叟字唐夫其先河朔人高祖羽為蜀令因家閬中父省華
字善則事孟昶蜀平授隴城簿遷櫟陽令開鄭白渠水利均及

民皆賴之徙樓煩令端拱三年堯叟登甲科占謝辭氣明辨上
問誰子王沔以省華對卽名爲太子中允俄判三司都憑由司
改鹽鐵判官遷殿中丞河決鄆州命領州事俄爲京東轉運趙
拜祠部員外郎知蘇州賜金紫時遇水災復流民數千戶殍死
悉瘞之詔書褒美歷戶吏二員外郎知潭州爲人智辨有餘優
於吏幹入掌左藏庫判吏部南曹擢鴻臚少卿景德初判吏部
銓權知開封轉光祿卿拜左諫議大夫以疾卒年六十八贈太
子少師堯叟初由光祿秘書二丞直史館久之充三司河南東
道判官命與趙况等分賑宋亳陳穎饑民遷工部員外郎廣南
西路轉運使嶺南地氣蒸暑民俗病者禱神不服藥堯叟以集
驗方刻石柱州驛又植樹鑿井置亭舍具飲器人免天厲會加
恩交州黎桓爲國信使前使者往必厚獲贈遺桓悉斂之於民
至斷手及足趾堯叟奏却其私覲又桓界亡命來奔者盡歸之
桓感恩盡力捕海賊以報值歲調雷化高藤容白諸州兵輦糧
汎海以給瓊州其兵不習水利率苦沉溺堯叟因爲規度海北
岸有遞角場正與瓊對風便一日可達且與雷化高太平四州
水路接近迺移四州民租輸於場令瓊州歲遣蠶兵具舟自取
人以為便咸平初詔諸路民種桑棗堯叟以非地所宜請易種
麻苧以折桑棗之數諸縣令佐依例書課從之還轉刑部充度
支判官未幾撫水蠻酋蒙令國殺使臣擾動復命爲廣南東西
路安撫使賜金紫事平遷主客郎中樞密直學士知三班院兼
銀臺司河決王陵口詔往護塞時中外上封事甚衆命詳定利
害拜右諫議大夫簽書樞密院事幹敏有材詔與直史館孫冕
檢覆判決三司官吏積滯文牒經五七歲不決者凡省去煩冗

文帳二十一萬五千餘道又減河北冗官七十五員進給事中
同知樞密院事真宗幸澶淵乘傳先赴北砦按視戎事許以便
宜歷遷刑兵二部侍郎知樞密院事真宗朝陵權東京留守制
決裁斷獄無繫囚雖大辟止面取狀付丞佐決遣上密加訓諭
謂重事宜付有司按鞠詳察改領羣牧制置使多立條約著監
牧議述馬政之重東封加尚書左丞預修國史撰朝覲壇碑進
工部尚書獻封禪聖製頌帝作歌答之祀汾陰爲經度制置使
判河中府禮成進戶部尚書又撰親謁太寧廟頌加特進賜功
臣號素善草隸詔寫途中御製歌詩刻石五年授檢校太傅同
平章事充樞密使加太尉謁太清宮爲鹵簿使進開府儀同三
司足疾請告帝臨問懇求避位拜右僕射知河陽肩輿入辭許
三子扶掖升殿賜詩爲餞卒年五十七廢朝贈詩中諡文忠錄

其孫知言知章爲將作監簿子師古第進士爲都官員外郎希
古至太子中舍賜緋家本富祿賜且厚父子兄弟及諸孫皆任
官宗親登科者衆榮盛無比而能禁絕華侈自處儉約事親以
孝謹聞毋封上黨郡太夫人進滕國年八十餘尙無恙後諸子
卒有所著請盟錄二十卷堯咨字嘉謨進士第一授將作監
丞通判濟州名爲秘書郎直史館判三司度支勾院擢右正言
知制誥改起居舍人同判吏部流內銓特進寒士矯舊格用舉
者遷官帝從之歷右諫議大夫集賢院龍圖閣二學士工部郎
中出知永興軍長安地斥鹵無甘泉爲疏龍首渠注城中民利
之性素剛戾豪侈不循法度厰武庫建視草堂開三門築甬道
出入列兵自衛用刑慘急杖數致死又以氣凌轉運樂黃目坐
徙河南因舉前事不法削職徙鄧州忽忽不自樂帝降詔切責

言上恩所以保佑者始皇恐稱謝還判登聞檢院復龍圖閣直
學士邊臣奏唘厮羅立文法名蕃部欲侵邊以爲陝西緣邊安
撫使知秦州徙同州以工部侍郎權知開封入爲翰林學士換
宿州觀察使知天雄軍皇太后名諭敦遣自契丹修好城壁器
械久不治亟葺完之俄授安國軍節度觀察留後知鄆州拜武
信軍節度使知河陽徙澶州卒贈太尉諡曰康肅於兄弟中最
爲少文然以氣節自任工隸書善射子述古太子賓客博古篤
學能文爲館閣校勘早卒 從子漸字鴻漸少以文學知名淳
化中與父堯封試廷中太宗擢漸第輒辭不就願擢其父許之
咸平初始仕爲天水縣尉時學者罕通楊雄太玄經漸獨好之
著書十五篇號演玄奏之名試學士院授儀州軍事并隴西防
禦皆推官坐法免歸不復有仕進意蜀中學者多從之遊後召

至京師除潁州長史再除鳳州團練耀州節度一推官卒有文集十五卷自號金龜子

馮拯字道濟父俊事漢湘陰公劉贇贇死繫獄周祖赦出之戊
安遠軍因徙居河陽拯少以書生上謁趙普奇其狀貌語曰子
富貴壽考宜不下我登進士補大理評事通判峽州轉知澤州
遷太常丞江南旱馳傳賑貸貧乏察官吏能否還奏稱旨擢右
正言使河北與轉運樊知古計邊儲還判三司戶部理欠憑由
司并度支判官淳化中與尹黃裳王世則洪湛伏閣請立許王
元僖爲嗣帝怒悉貶嶺外知端州請遣使括諸路隱丁更制版
籍及議鹽法通商凡十餘事寇準不悅徙知鼎州改通判廣州
郊恩以左正言爲虞部員外同僚彭惟節以太常博士爲屯田
員外書名在惟節上準言其變亂因上書劾準坐罷俄因母喪

張倫金 卷一百之一
徙知江州真宗進比部員外郎中丞李惟清表爲推直官判三
司度支勾院遷駕部咸平初坐考試賦涉譏訕下臺獄尋釋之
明年兼侍御史知雜事劾王超傳潛將兵觀望玩寇不報果致
覆軍命按驗抵罪擢祠部郎中樞密直學士權判流內銓建請
凡蔭補京官試讀經書家狀通習爲中格始得仕同勾當三班
院副向敏中宣撫河北河東宴餞長春殿還以諫議大夫同知
樞密院事帝欲修綏州城堡拯與敏中言便與蒙正旦欽若異
帝遣洪湛馳驛往視還上七利二害卒修之循例檢覆三司滯
務遷工部侍郎簽書樞密院事首訪邊事謂今歲防秋宜於唐
河增屯兵控定武之北爲大陣邢州置都總管爲中陣天雄軍
置鈐轄爲後陣罷莫州狼山兩路兵從之景德中拜叅知政事
再遷兵部侍郎論事多合上意契丹始盟拯言邊方騷動武臣
幸以爲利帝謂朝廷以信爲守戒備雖不可廢尤當靜治以安
吾民爾其奉承之祥符初嚴貢舉糊名法拯請兼攷策論不專
詩賦帝謂文論可觀才識命行其言封泰山祀汾陰皆爲儀仗
使禮成進尙書左丞以疾請罷起工部尙書復引疾七年除御
史中丞又以病辭除戶部尙書知陳州帝問何固求閑郡王旦
言馬知節嘗譏拯好富貴欲節度使恐爲所量故耳俄再知河
南遷兵部尙書入判尙書都省錢惟演言其純和不比寇準遂
以吏部尙書檢校太傅同中書門下平章事充樞密使其冬拜
右僕射兼中書侍郎太子少傅集賢殿大學士又進左僕射乾
興元年封魏國公仁宗卽位遷司空兼侍中山陵事覺丁謂知
得罪頗哀請惟演云當致力必無大憂拯熟視之惟演踧踖及
對承明殿太后怒甚欲誅謂拯言謂固有罪但恐帝新卽位亟

誅大臣駭天下耳目。后怒少解，遂令代爲司徒。玉清昭應宮使昭文館大學士監修國史，又爲山陵使。始謂請山陵名曰鎮陵，拯改爲永定，不知翼祖已名定陵，追改爲靖陵。當時議者譏拯不學，恨無正之者。時拯爲首相，欲躡謂故迹，賴王曾曉以禍福，且逆折之，因不敢肆。凡大事一決於兩宮，尋奉安真宗御容於西京，以病告，賜白金乞罷。拜武勝軍節度使，檢校太尉兼侍中，判河南卽臥內，賜告及旌纛，拯自奉實侈。太后遣內司賓撫問，故爲儉陋，被服甚質，還奏賜以衾裯錦綺，薨贈太師，中書令諡文懿。拯爲人氣貌嚴重，官者傳詔至中書，不延坐，林特嘗詣私第，累日不得通白，以容事使詣中書，旣至，遣堂吏問公事，何不自達，卒不見，特愧而去。惟演營入相，以太后姻家，亦不許之。子行已字肅之，蔭補右侍禁，涇原路駐泊都監，歷知憲石保霸。

冀莫定七州所至，以能稱治，狀咸異，詔增秩，韓琦薦爲代州鈐轄，管幹河東緣邊安撫事。進西上閣門使，四遷客省使，更高陽關秦鳳定州大名府路馬步總管，以衛州防禦使致仕。預洛陽耆英會，年八十四卒，贈金州觀察使。仲巳字齊賢，蔭補右侍禁，累遷西頭供奉官，閣門祇候，桂州兵馬都監，運使俞獻可辟薦知廉與宜州，天聖中改桂宜融柳象沿邊兵馬都監，專管溪峒事。知邕州，明道中領榮州刺史，移夔梓廣西南路鈐轄，安化蠻犯邊，官軍不利，仁宗遣中人趣討，日夜馳至宜州，繕器甲，轉糧餉，適區希範應募擊賊，由三路以進，蠻見仲巳出陣，仰泣羅拜，曰：不圖今日再見馮公。遂棄兵械，率衆詣軍門降。論功，遷西上閣門使，抑希範功，編管全州。巳而逝，歸謀亂嶺外，騷然議者皆罪仲巳，尋領果州團練使，改右武衛大將軍，分司西京卒。

曹利用字用之趙州寧晉人父諫擢明經仕至右補闕武畧大
夫終崇儀使利用少喜談辯慷慨有志操蔭補殿前承旨改右
班殿直郟延路走馬承受公事景德初奏事行在會擇使契丹
者以爲重事毋輕用人樞密王繼英薦授閤門祗候崇儀副使
奉書詣軍前帝語以此行契丹不求地則邀賂爾關南地歸中
國已久不可許若求金帛漢有故事可許之既至果議關南地
對曰晉人以地畀契丹周人取之非緣我朝不敢與聞若求金
帛歲佐軍用尙不知帝意可否其政事舍人高正遠前曰我引
衆來圖復故地若止得金帛愧吾國人多矣利用曰子盍爲契
丹熟計利害果如子言恐連兵結讐不得少息契丹度不可屈
遂定和議奉約書以歸擢東上閣門使忠州刺史賜第京師四
年宜州卒陳進因知州劉永規馭下殘酷乘衆怨併監軍殺之

劫判官盧成均以叛陷柳城圍象州分兵掠廣州嶺南騷動帝
曰向者司天占候當用兵朕因憂遠方守將非其人以起邊釁
今果然乃拜爲廣南安撫使初武仙縣賊皆持健標蒙采指衣
甲堅利鋒鏑不能入利用使壯士奮長鎗巨斧破其標槍斬首
以徇嶺南悉平厯遷引進客省嘉州防禦三使出爲郟延路總
管祥符七年拜樞密副使知宣徽北院事進樞密使同中書門
下平章事在位頗恃功與丁謂別黨相結當李廸爭論帝前言
及利用恚曰以片文遇重臣不如廸捐軀以入不測之寇廸不
逮臣廸坐是免遂以檢校太師兼太子少保爲會靈觀使進尙
書右僕射乾興初封韓國公仁宗卽位加左僕射兼侍中武寧
軍節度使契丹使蕭從順桀驁稱疾留館下不時發利用請一
切罷遣使問勞從順引去加司空領景靈宮使班宰相王曾上

弘簡錄 卷一百之一 五
未幾會領玉清宮使班應在上閣門不敢裁帝與太后御殿次之趣追班會抗聲奏宰臣王曾告謝始退居下尙在次相張知白上其驕蹇若此尊名張旻爲樞密疑其代已始懼悔焉爲人悍梗少通以勳舊自居力裁僥倖凡內降恩執持不予后亦嚴憚稱爲侍中不名而中人貴戚左右咸怨利用奏事簾前間以指爪擊帶鞋左右輒以白后曰在先帝時政爾耶后始領之復揣知所降有可從者給言親舊及家媪陰諾臣已而果驗后疑有私怒之又奉詔戒飭羅崇勳去其冠幘詎斥良久崇勳亦恨會從子洸爲趙州兵馬監押被酒衣黃衣呼萬歲爲州民趙德崇告命崇勳往按坐洸杖死遂罷利用等謫左千牛衛將軍又坐私貸景靈宮錢貶崇信軍節副于房州安置行至襄陽驛投繯而絕議者言其在朝忠盡有守始終不屈死非其罪天下冤

之明道二年追復故官後贈太傅諡襄悼命學士趙槩作神道碑帝爲額曰旌功之碑

夏竦字 喬江州德安人父承皓太宗初上平晉策補右侍禁

隸大名 契丹內寇山間道發兵夜與遇力戰死之贈崇儀使

錄竦乃 縣簿資性明敏好學自經史百家陰陽曆律佛老之

書無不通曉爲文典雅藻麗舉賢良方正擢光祿寺丞通判台

州名直集賢院兼國史編修判三司都磨勘司爲右正言帝幸

亳州留 推官仁宗封慶國公命教書資善堂未幾同修起

居注鉅玉而景靈宮會真觀事遷戶禮二部員外郎景靈宮成

遷禮部郎中妻楊氏亦工筆札有鈎距以竦多內寵悍妬不諧

竦出訟 陰事左遷職方員外歷知黃鄧襄三州歲饑勸大姓

出粟全活者衆仁宗卽位轉戶部郎復知壽安洪三州洪俗尙

鬼竦至索部中丞覲盡還農業毀其淫祠竦材術過人然急於
進取喜交結任術數傾側反覆世以姦邪目之居內憂潛至京
師依中人張懷德與宰相欽若善因左右之言於太后起復知
制誥判集賢院以左司郎中兼翰林侍讀龍圖三學士勾當三
班院兼譯經潤文官左諫議大夫樞密副使修國史遷給事中
初武臣賞罰無法吏得高下爲姦竦因集前比著爲定例事皆
按比而行天聖七年改參知政事充祥源觀使增設賢良等六
科復百官轉對置理檢使與呂夷簡不協復爲樞密副使歷刑
兵二部侍郎進尚書左丞太后崩罷爲禮部尚書連知襄穎二
州京東饑徙青州兼安撫使又改刑部尚書知應天府寶元初
由戶部尚書入爲三司使元昊反拜泰寧軍節度使知永興軍
聽便直行事復徙忠武軍知涇州進宣徽南院使兼陝西經畧

安撫招討與陳執中論兵事不合徙屯鄜州條上十事一教習
疆弩以爲奇兵二羈縻屬羌以爲藩籬三詔唃廝囉父子并力
破賊四度地形險易遠近砦柵多少軍士勇怯而增減屯兵五
詔諸路互相應援六募土人爲兵州各一二千人以代東兵七
增置弓手壯丁獵戶以備城守八並邊小砦視賊緩急棄小保
大以完兵力九許關中民入粟贖罪以贍邊計十省並邊冗兵
冗官及減騎軍以舒饋運當時頗採用之朝廷多向邊臣議出
師征討竦言未便又雅意在朝不樂西事請解兵柄改判河中
府徙蔡州慶曆中召爲樞密使臺諫交章論竦在陝畏懦不肯
盡力每托兵少爲辭實懼敗衄其論邊事但列衆人之言至遣
勅使臨督募土人爲兵仍爲御史楊偕議屈每遇巡邊置婢帳
中幾致軍變爲元昊輕侮募得竦首者與錢三千今復用之何

以求治會竦已至國門諫官余靖又論前者累表引疾一聞召用兼驛而馳若不早決伺面對叙恩感泣左右復爲之地則聖聽惑矣章累上徙知亳州改吏部尙書資政殿學士既至上書自辨復拜宣徽南院使河陽三城節度判并州請復宦者走馬承受明年拜同中書門下平章事判大名府又明年召入知政制下臺諫復言大臣和則政事修竦懷欺不忠夷簡畏其爲人不肯同列執中議論難合不與共事改爲樞密使封英國公請析河北爲四路時有親事官夜入禁中爲亂凡領皇城司皆坐逐獨楊懷敏領入內都知如故言者以爲竦曲庇之值京師同日無雲而震者五帝趣召學士張方平語以夏竦姦邪致天變如此宜出之遂罷知河南未幾加兼侍中饗明堂徙節武寧軍進封鄭國公錫賚與輔臣等自此遇大禮將相居外者始有賜

尋卒贈太師中書令諡文莊生平文學有名朝廷大典策屢以屬之多識古文奇字有文集一百卷爲郡多治績喜作條教立閭里保伍之法盜賊不敢發人亦苦其煩擾治軍尤嚴敢誅殺卽疾病死喪拊循甚至嘗有龍騎卒戍邊羣剽州郡莫能止竦以告竦俟其至誅斬殆盡其威畧多類此然性貪鄙數商販部中在并州僕侵盜所貿易資至杖殺之積累家財鉅萬自奉侈靡多畜聲伎所在陰間僚屬使相猜阻以鈎致其事遇家人亦然子安期字清卿以任爲將作監簿召試賜進士出身累遷太常博士提點荆湖南道刑獄爲開封府推官又判三司鹽鐵勾院出爲京西轉運使所部盜起剽劫州縣與光化軍叛卒勢相合督將吏捕斬殆盡轉河東累遷工部郎中江淮發運使入爲三司戶部副使會元昊納款命往陝西與諸路經略安撫議

損邊費省吏員汰邊兵不任役者五萬擢天章閣待制陝西都
轉運使徙河北進兵工二部郎中知永興軍進龍圖閣直學士
吏部郎中知渭州簡弓箭手驍勇萬人為步兵騎又半之教以
戰陣法由是土兵勝他路又籍塞下閑田募人耕種歲得穀數
萬斛以備振發名曰貸倉遷右諫議大夫樞密直學士徙延州
父憂服除求兼侍讀入侍經筵為世所譏復提舉集禧觀知延
州州東北阻山無城郭敵騎嘗乘之至即開廣數百步四面完
葺元昊請畫疆界奏以方暑不煩遣使與衙校畫之未幾卒遣
中使護喪安期雖乘世資頗以才幹自厲朝廷數器使之然無
學術奉養聲伎不減其父

冊曰長君之惡罪在元臣逢君之惡五鬼通神馮陳曹者
碌碌因人竦也嗜進姦邪誤身貽我袞闕辱我縉紳

弘簡錄卷一百之二

明刑部員外郎仁和弘齋邵經邦學

皇清翰林院待講學士四世孫遠平校閱

宰輔 宋二之四

王曾弟 張知白 張士遜子友直等 呂夷簡子公弼公綽

王隨 陳堯佐 章得象祖頰從子案望之孫緯線等

晏殊 杜衍 賈昌朝伯祖琰弟昌衡從子炎


王曾字孝先青州益都人少孤仲父宗元鞠之學於里人張震
文辭優贍占中三元除將作監丞通判濟州代還特試政事堂
寇準奇之授著作郎直史館為三司戶部判官使契丹致書稱
為北朝曾曰從其國號是矣何用對稱兩朝上是之然弗果易
僅隨事損益豐約中度後奉使者悉循其制時稱得體遷右正

言知制誥兼翰林學士入對言天瑞荐至以誇示中外此誠盛德所致然願推而弗居異日或有災沴可免輿議及建玉清昭應宮復陳五害以諫帝重大理刑獄舊制郎中判之特以命曾因請自辟僚屬著爲令帝嘗晚坐承明殿召對不及朝服退使內侍諭意向思卿甚勿以爲慢其見尊禮如此移知審刑院舊例違制無故失率坐徒二年曾請須親被旨乃坐遷主客郎中知審官院歷通進銀臺司勾當三班院以右諫議大夫參知政事時宮觀皆輔臣領使曾當使會靈以推欽若帝不悅曰大臣宜傳會國事豈容自異曾頓首曰君從諫謂明臣盡忠謂義臣知義而已不知異也欽若方排異已乃發曾市賀后家第宅小事罷爲禮部侍郎判都省俄出知應天京師以南訛言有妖若飛帽夜搏人曾令夜開軍門敢倡言者坐之卒以無妖徙天雄

軍復參知政事遷吏部侍郎兼太子賓客真宗不豫命太子聽事資善堂后實居中預政事皆專決中外方憂之曾密語后戚錢惟演曰太子幼非中宮不能立中宮非倚太子不能安願加恩太子太子安則劉氏亦安惟演以爲然因入白后深見聽納遣詔立仁宗皇太后權聽斷軍國大事丁謂欲去權字曾謂皇帝冲年太后臨辨斯國家否運稱權稱足以示後日增減制書法令有在表則之地何可亂乎遂不敢去遷禮部尙書時議臨朝儀曾與羣臣請如東漢故事太后坐帝右垂簾奏事謂獨請帝刺望見羣臣有大事則太后召對輔臣決之非大事令入內押班雷允恭傳奏禁中書可以下曾言兩宮異處而兩歸宦官禍端兆矣既而果得罪自是兩宮垂簾輔臣奏事咸如初議時帝始崩內外洶洶曾正色獨立朝廷倚以爲重拜中書侍郎同

文館大學士監修國史奏帝德方昇宜近師儒命孫奭馮元勸
講崇政殿四年夏大雨喧傳汴口決水大至都人皆恐咸欲東
奔帝以問會謂訛言不足慮果亦無害陝西轉運置醋務權以
取利請推其法於天下力言能之為政方嚴持重每進見言利
害事審而中理尤好拔材專惡僥倖嘗因帝問比來臣僚多請
對求進會言願陛下擇奔競崇恬靜庶幾有難進易退之風曹
利用惡班已上快快不悅及坐事太后大怒輒為之解后曰卿
向言其橫今何解也會曰利用素恃恩臣故嘗折以理今加大
惡則非所知后意少釋始從輕比先議太后受册將御大安殿
曾執為不可及長寧節上壽止令供張便殿又稍通左右姻家
請謁多裁抑之后滋不悅會王清宮災罷知兗州復以彰信節

度使知天雄軍契丹使往還斂車徒而過無敢譁者人樂其政
為畫像生祠之改天平軍判河南景祐元年遷樞密使明年拜
右僕射同平章事學士如故加封沂國公進退士人不肯沾恩
故人莫有知者范仲淹嘗問明揚士類宰相責也公之盛德似
少此耳會曰執政者恩欲歸已怨使誰歸仲淹服其言夷簡初
參政事事會甚謹會力薦為相及後位會上又任事久多所專
決漸不能堪論議間有異同帝疑以問曰卿亦有所不足耶時
風聞知州王繼明納賂事會以詆夷簡其言未免有過遂俱罷
以左僕射資政殿大學士判鄆州寶元元年十月有大星晨墜
其寢左右驚告語以後一月當知如期而薨年六十一贈侍中
諡文正為人丰姿端厚眉目如畫在朝出入進止皆有常處視
者不失尺寸性復周密沉靜在上前開陳辨博有餘平居寡言



笑未嘗及省中語當國七年莫敢干以私入謂務大體若丙吉
清淨如曹參領衆職如魏相進賢不植私愛不立黨援退不肖
不好怨親族可任言之上不可任厚分之財時被其化察察者
敦沾沾者愧焉皇祐中仁宗篆神道曰旌賢之碑改鄉曰旌賢
鄉大臣賜碑篆始此仁宗祠廟配享第一無子以從子繹爲後
繹官至兵部郎中祕閣校理本生父名皞字子融後以字行復
字熙仲及第遷太常丞同知禮院嘗論次國朝以來典禮因革
爲禮閣新編又集五代事爲唐餘錄以獻進直龍圖閣累遷太
常少卿判大理寺仍取獄獄輕重可爲準者類次以爲斷例拜
天章閣待制吏部郎中知荆南遷右諫議大夫給事中進刑部
侍郎致仕卒


册曰君臣同德亦同其命社稷之臣卓哉文正胡獨嗣慳

張知白字用晦滄州清池人方九歲父喪邢州殯於佛寺旣長

篤學聰悟嘗與孫何讀道旁古碑凡數千言遺讀皆無所遺及
登第徒步往求父喪時契丹寇河北寺宇已廢尋至殿基恍然
識其處發之衣衾皆可驗衆歎其誠孝累遷河陽節度判官疏
當今要務真宗異之名試舍入院權右正言獻鳳展箴出如劔
州逾年召試中書改直史館而賜五品服判三司開拆司江南
早與李昉分路安撫及還權管勾京東轉運事司天言周伯星
見宜賀知白以爲人君當修德應天星之見伏無所關繫因陳
治道之要帝語宰臣曰可謂乃心朝廷矣東封進右司諫請以
泰山諸瑞圖寘昭應宮藏其副秘閣以後無俾誕漫命出按陝
西饑尋知鄧州會關右流徙至境發倉廩募民粟以濟之擢龍

圖閣待制知審官院再遷工部郎中使契丹還以時方重內輕外獨引唐李嶠議遷臺閣典藩郡故事固請補外擢知青州代還求領國子監帝疑倦於處劇宰臣言其更踐中外未嘗為身謀乃遷右諫議大夫權御史中丞兼給事中俄拜參知政事郊恩進工部侍郎班在王曾下心不能平累表辭職詔加金紫光祿大夫判禮儀院與欽若論議多相失稱疾辭位罷為刑部侍郎侍讀學士知大名府轉南京留守丁謂惡欽若罷為分司意其報怨既至待之加厚謂怒復徙亳州遷兵部侍郎仁宗即位入為尚書右丞樞密副使天聖初契丹大閱聲言獵幽州朝廷患之以問二府皆請練師積粟以備不虞知白獨言修好未遠正以上初政試觀舉措何如耳豈可輒自生釁耶若終以為疑莫如因河決發兵以防護為名彼且不虞果如其言而罷三年拜工部尚書集賢殿大學士同中書門下平章事領會靈觀使時進士唱第賜中庸篇上命知白進讀至修身為政之要必反復陳之在相位慎重名器無毫髮私屢以盛滿為戒雖經顯貴清約一如寒士體素羸弱憂畏日侵六年春二月忽感風眩帝臨問已不能語薨為罷上已宴贈太傅中書令謚文節無子以姪子思為後任至工部侍郎致仕

張士遜字順之祖裕主陰城鹽院因家焉初生喪母父姑鞠之登進士調鄆鄉簿遷射洪令檄移治郿縣民遮馬首不得去聽還知州張雍薦為第一改襄陽令遷著作佐郎知郃武縣以寬厚得民前後禱雨輒應改秘書丞監折中倉歷御史臺推直官楊億薦為監察御史嘗巡糾貢舉初用糊名法以親嫌避去著為令遷侍御史歷江西廣東河北轉運使河侵棣州詔移治陽



信議者患根多難徙士遂爲視瀕河艱食州縣權貸之期來歲
輸陽信公私便利仁宗出閣帝特選士遂以戶部郎中直昭文
館爲壽春郡王友令王咎拜禮異府僚封昇王又爲諮議參軍
建儲歷左右庶子詣資善堂升階列拜太子猶跪受請詔坐受
帝不許自今凡遇太子侍駕出入許陪從連任太子賓客詹事
改樞密直學士判集賢院仁宗卽位擢樞密副使遷給事中尙
書左丞天聖三年拜禮部尙書同中書門下平章事集賢殿大
學士曹炳獄起官者羅崇勳江德明方用事因譖利用帝疑以
問執政咸顧望未敢對士遂徐曰此獨不肖子爲之利用大臣
宜不知狀太后怒將罷之帝以東宮舊臣改刑部尙書知江寧
解通犀帶賜之後領定國軍節度使知許州明道初召復中書
侍郎兼兵部尙書太后崩進門下侍郎昭文館大學士監修國

史是歲旱蝗不能有所建明及帝自損尊號請降官一等以答
天變不許會上莊懿太后諭士遂適過楊崇勳飲不至爲中丞
范諷所劾罷爲左僕射判河南入謝改節山南東道同平章事
判許州寶元初復召封郢國公入對帝從容言朕昨放宮人不
獨憫幽閉亦省浮費近復有獻女者朕卻而弗受士遂曰此盛
德事也帝又曰近言官有毀大臣揭君過者對曰陛下但察其
邪正則險訐之人宜自戒矣會有挾怨告陳堯佐謀反誣諫官
陰附宗室者士遂謂此皆憮人構陷善良以搖朝廷恐姦僞一
開禍無所紀帝悟而止馮士元獄具帝復以問對曰臺獄阿徇
非出宸斷何以愜中外之論帝曰君子小人有黨乎曰有之第
公私不同誠使法令必行邪正有別則朝綱舉矣康定初言禁
兵久戍其家有不能自存者帝命條指揮使以下爲差等出內

藏鏹十萬賜之又請遣使安撫陝西以命韓琦詔密院自今邊
事並與士遜等參議值棟輦官于餘人為禁軍遮兩府喧訴士
遜方朝馬驚墮地上章請老拜太傅封鄧國公致仕宰相得謝
自此始也御酒飛白千歲二字賜之因建千歲堂就第凡十年
薨年八十六上臨奠贈太師中書令諡文懿御篆神道曰舊德
之碑生平事所鞠姑盡孝亡為行服徒跣以葬追封南陽縣大
君其在政府日人見其無所可吝以和鼓目之為御史楊偕所
劾謂納女口宮中亦未之明也子友直字益之初補將作監
簿遷丞父為請館閣校勘仁宗不可言館閣所以待英俊自今
毋得增員但令館閣讀書後編書籍成始遷秘閣校理同知禮
院復登進士除集賢殿修撰天章閣待制累遷工部郎中知襄
陝越三州父嘗記東宮舊事史官未之見者友直纂為資善錄

上之友正字義祖杜門不治家事居小閣學書積三十年不輟
遂以書名神宗評其草書為本朝第一

冊曰勢位靡常人苦莫知千歲名堂今古所稀呼號若人
可以語幾

呂夷簡字坦夫祖龜祥為殿中丞知壽州遂為州人父蒙亨進
士高等以蒙正柄國寄理報罷後歷下蔡武平二簿至道初引
對文學政事俱優歷光祿大理二寺丞咸平三年夷簡登第補
絳州軍事推官改潁州遷大理丞太常博士祥符中按河北水
災選知濱州還奏農器有筭非所以勸力本也詔除之擢提點
兩浙刑獄名為祠部員外郎時大營官觀掄材南方期會工徒
至有死者請緩其役又言盛冬挽運艱苦亦須河流漸通漕卒
番送真宗曰覽卿奏可謂有為國愛民之心矣改刑部兼侍御

史知雜事蜀寇李順俘送闕左右稱賀既而按之非是賀者趣具順獄夷簡不肯卒以寶奏永興卒上寇準變事夷簡曰是欲中傷準爾宜勿問值歲蝗請上責躬修政嚴飭輔相以共順天意又奏彈李溥專利罔上不法狀咸詔從之俄避中丞趙安仁親嫌改起居舍人兼通進銀臺封駁司使契丹還遷知制誥兩川饑爲安撫使進龍圖直學士刑部郎中權知開封治嚴辦有聲上識姓名御屏將大用之仁宗立進右諫議大夫給事中參知政事與魯宗道驗治山陵地請納天書方中因言太后欲因耐廟具平生服玩器具及以銀罩覆神主此皆未足爲報惟存遠姦邪獎忠直輔成聖德斯所以報先帝也郊恩以故事豫辭遷官久之除禮部侍郎天聖七年進拜戶部侍郎同中書門下平章事集賢殿大學士充景靈宮使昭應宮災太后意將復營

因雅洪範災異以諫后爲之默然復奏罷兼官觀進吏部侍郎昭文館大學士監修國史天聖末加中書侍郎順容李氏薨司天希旨言歲月葬未利夷簡奏順容誕育聖躬倘喪不成禮異日必有受其罪者請發哀成服備儀仗葬之詔又欲鑿宮垣以出因復求對太后揣知其意遣羅崇勳問何事夷簡言鑿垣非禮宜自西華門出崇勳馳白太后許之大內火帝御拱辰門百官拜樓下夷簡獨不拜曰宮庭有變願一望清光帝舉簾見之乃拜督修大內成進尙書右僕射兼門下侍郎荆王子長育禁中太后欲留從帝謂讀請曰上富於春秋所親非儒學之臣恐無益聖德卽命還邸帝親政首陳八事正朝綱塞邪徑禁貨賂辨佞士絕女謁踈近習罷力役節冗費語甚切至帝始與夷簡謀將罷太后所任張者等退而語郭后后曰夷簡獨不附太后

耶但多機巧善應變耳明日亦罷爲武勝軍節度使檢校太傅同平章事判陳州歲中復相適郭后因批尙美人頰誤傷帝頸以爪痕示之夷簡曰光武漢之明主止以怨懟廢郭后况傷陛下頸乎議遂決又以宗室子衆議建睦親宅增教授員置大宗正以糾率之景祐二年加右僕射封申國公坐與王曾爭論帝前同罷以鎮安軍節度使同平章事判許州康定元年復召慶曆元年進封許國公命總判樞密院事諫官田况言總判名太重改兼樞密使契丹聚兵幽薊聲言將入寇議者請從范仲淹初議城洛陽以備急難夷簡奏契丹畏壯侮怯遠城洛陽亡以示威若使得渡河雖高城深池何可恃耶且景德之役非乘輿渡河亦未易服宜卽眞宗駐蹕之所建都示將親征以伐其謀上從之乃建北京二年病上憂之剪髭以療加特進司空平章

軍國重事五日一至中書三年罷爲司徒監修國史預議軍國大事名見延和殿命內侍輿以前問誰可代因薦富弼遂以太尉致仕薨年六十六帝泣對羣臣安得憂國忘身如若人者乎贈太師中書令諡文靖始仁宗幼冲太后臨朝十餘年天下晏然其力居多後西夏用師契丹求地復賴計畫選將命使二邊以寧然建募萬勝軍雜市井小人浮脆不任戰鬪用宗室補環衛官驟增奉賜加契丹金繒歲二十萬當時不深計之其後費大而不可止又成郭后之釁逐孔道輔范仲淹於外時論以此少之遇天下事屈伸舒卷動有操術故柄國最久嘗令宋綬編中書總例語人曰自吾有此例雖庸夫執此可任宰相矣後言官雖數詆眷倚不衰然所斥士旋復收用亦不終棄帝又欲立陳氏女力請止之始王旦語王曾言其器識遠大君宜善交之

卒與曾同相後同配食仁宗廟庭稱名宰相曾家請御篆墓碑
帝亦慘然思之因書懷忠之碑以賜有集二十卷四子公著宰
相公弼字寶臣登進士遷直史館河北轉運自寶元慶曆以
來宿師備邊雖撤警屯戍如故民疲餽餉公弼始通御河漕粟
塞下權治鐵以助經費仁宗嘉其材識名殿柱擢爲都轉運加
龍圖閣直學士知瀛州入權開封營奏事退帝以爲甚似其父
目送之改同羣牧使時英宗居藩得賜馬頗劣欲易不可尋以
樞密直學士知渭與延州徙成都其治尙寬人疑少威有營卒
犯法當杖扞不受曰寧以劔死公弼曰杖者國法劔汝自請杖
而後斬之軍中肅然英宗嗣位爲三司使繼蔡襄後時多留事
帝問何以處之頓首謝曰襄勤於事未嘗有曠失恐言者過耳
人稱其長者拜樞密副使言諫官耳且批政股肱二者必相爲
用然後身安而元首尊宜考言觀事視其所以而進退之勿雖
因爭事罷去彗出營室上言彗非小變請皇上側身修德以應
天戒神宗立轉刑部侍郎司馬光劾內臣高居簡公弼言二臣
勢不兩立居簡內臣耳而光中執法願陛下擇其重者問當奈
何對曰遷居簡一官而解其近職光當無爭從之俄進樞密使
時欲併環慶鄜延爲一路駁以自白草西抵定遠中間相去千
里猝有緩急將何以應乃止陳升之議衛兵年四十以上稍不
中程者減其廩徙之淮南疏以非人情儻有反側爲之奈何帝
曰是當退爲剩員者今故爲優假何害對言臣不敢生事邀名
正恐誤國耳韓絳議復肉刑又力陳不可帝皆爲之止公弼素
不附安石將草疏論新法從孫嘉問竊取以示安石先入白之
遂能爲觀文殿學士知太原府時韓絳將城囉兀令發兵二萬

越神堂新路公弼度敵必設伏待我改由永和關既而新路援
兵果遇伏詔褒之麟州無井泉由外汲欲築城包之而土善陷
每敵圍城人憂渴死公弼用僚屬鄧子喬計去其沙實以末炭
堽土於其上版築立就自是得堅其守王韶取熙河謀置帥帝
謂其有緩御之能拜宣徽西院使判秦州却羌酋董氈貽書稱
救後懼不敢纒旬月以疾爲西太一官使卒年六十七贈太尉
諡惠穆 公綽字仲佑蔭補將作監丞知陳留爲館閣校理歷
太子中允工部員外郎史館修撰判太常寺時郊廟祭器未定
制度多違禮請悉更造故事議定薦新諸物或過時陳敗因採
月令諸書四時新物所當薦者配合爲圖以獻諸后皆繫祖宗
諡獨真宗五后尙諡莊請更爲章悉行其言後爲龍圖閣學士
知開封終右司郎中爲人通敏有才然多徇人干請洩漏市恩
故人以比竇中 公孺字稚卿蔭爲奉禮部登第判吏部南曹

仁宗喜其占對詳敏歷知澤潁廬常四州判都水監改陝西運
使元豐初命知永興軍徙河陽元祐中加龍圖直學士遷刑部
侍郎知開封爲政明恕終戶部尙書生平廉儉與人寡合嘗護
曹佾喪辭厚餉不受世清其節

冊曰盛德無涯權術有殊帝母則得帝后何辜終帝之世
白璧有疵所以修齊而後國治

王隨字子正河南人登甲科爲將作監丞通判同州遷著作郎
直史館判三司磨勘轉京西運副陞辭言得待嚴慈藥膳聖主
之澤真宗賜詩寵行以羊酒束帛過家爲壽遷淮南運使父憂
起復值歲饑敕屬部出庫錢貸民市種糧歲中約輸絹以償流
移復業徙河東三遷刑部員外郎兼侍御史知雜事擢知制誥

出知應天改揚州尋加右諫議大夫權開封命兼太子右庶子仍領府事俄遷給事中周懷政誅自陳出知杭州乾興初復降秘書少監徙通州忠學者少大修孔廟興起學校州人喜悉遣子弟就學母喪起復光祿卿知澗州徙江寧歲大饑大出官粟平價糶之復給事中以龍圖閣直學士知秦州故時軍卒犯罪逃入蕃部者多奴畜之小不如意復執出求賞隨下教能自歸者免罪復隸軍籍由是多來歸者又請增蕃落卒給廢墮馬地募民耕種徙河南復入爲御史中丞同知貢舉遷禮部侍郎翰林侍讀二學士明道二年安撫江淮還轉戶部侍郎拜參知政事改吏部侍郎知樞密院事監護莊惠太后園陵景祐四年拜門下侍郎同中書門下平章事昭文館大學士監修國史故事初入相無越遷門下者蓋學士丁度之失也頃以疾告詔五日

一朝入中書視事爲相一年無所建明與陳堯佐韓億石中立數爭事會忻代地震諫官韓琦言四臣皆非輔佐才同俱罷以彰信軍節度使同平章事判河陽堯贈中書令諡章惠後改文惠爲人外若方嚴內失於寬臨事多汗漫不能彈壓晚更下急輒嫚罵人性喜佛慕裴休然風跡弗逮

陳堯佐字希元少聰悟好學肄業錦屏山登第歷魏縣中牟二尉爲海喻一篇人奇其志授秘書郎知朝邑縣以兄堯叟使陝西發中人方保吉罪中人怨之誣以事降本縣簿徙下邳復知真源縣轉開封司錄叅軍遷推官坐言事忤旨降潮州通判修孔子廟作韓吏部祠有張氏子爲鱈魚所食遣吏往捕果得人驚異之名還直史館知壽州歲饑捐俸廩爲糜聞者競勸出粟益多賑活數萬人徙廬州父疾告歸侍俄爲兩浙運副初構石

爲錢塘江隄不久輒壞堯佐請下薪實土築之丁謂初不謂然後卒如其議徙京西河東地儉民仰石炭爲生奏蠲其稅又減澤州大廣冶鐵課數十萬徙河北毋老祈歸就養起糾察在京刑獄爲御試編排官坐置等誤降監鄂州茶場天禧中復知潯州河決造木龍以殺水怒徐築長堤人呼爲陳公堤復徙京西運使入爲三司戶部副使徙度支同修真宗實錄擢知制誥兼史館修撰知通進銀臺司進樞密直學士知河南徙并州每汾水暴漲民輒驚擾爲築堤植柳數萬本作柳溪民賴其利名同修三朝史代弟堯咨同知開封府累遷右諫議大夫翰林學士拜樞密副使知祥符陳詒治吏嚴急空縣逃去太后怒命加詰罪時夷簡姻聯不決堯佐獨曰罪誅則姦吏得詐後誰敢復繩者由是得免天聖七年除給事中參知政事太后崩例罷以戶部侍郎知永興軍過鄭爲郡人王文吉所告下中丞范諷劾治改知廬與同州復知永興奏言唐賢棗石碑礮悉因宦官起浮獻充磚甃卅前守姜遵毀及十七八矣其未毀者願救州縣完護之徙知鄭州景祐四年加同中書門下平章事集賢殿大學士以唐劉蕡策進對言堯佐之言皆當今之病天下治亂自朝廷始此臣之所欲言陛下之所宜行上嘉納之寶元元年災異數見援漢故事自責求去罷爲淮康軍節度使復判鄭州尋加太子太師致仕堯年八十二贈司空兼侍中諡文惠自登顯位讀書不輟善隸古并八分書爲方丈大字筆力端勁老而不衰尤工詩性儉約見動物必戒勿殺器服壞輒補之無使不完見棄晚號知餘子有文集三十卷又有湖陽編野廬編愚丘集遺興集

章得象字希言高祖仔鈞事闕爲建州刺史始家浦城後徙泉州祖頰字簡之與弟頰俱擢第歷校書郎大理殿中二丞知南昌九隴長洲三縣降監慶州趙天禧初擢監察御史安撫京西還爲三司度支判官屢按青州麻士瑤鞫邛州牙校訟鹽井事復忤旨捕繫后族劉美出知宣州還遷侍御史坐丁謂左遷比部員外郎監饒州酒起知信州改刑郎知福州不肯鬻王氏時賦民官王徙知潭州改廣西轉運撫宜州守貪暴不法反爲所訟謫知饒州入爲度支判官至刑部郎中使契丹卒父英妻方娠夢遇神人授以玉像及生復夢積笏充廷長而好學美儀表莊重不浮及第爲大理評事知玉山縣遷大府殿中丞承封簽判兗州改知台州歷南雄洪州楊億表薦得象有公輔器謂閩士率多輕狹獨得象深厚有容度量宏廓此其所以異也未幾召試爲直史館安撫京東權判三司度支遷刑部郎中使契丹改兵部知制誥踰年爲翰林學士遷右諫議大夫至給事中復爲羣牧使太后臨朝遷禮部侍郎兼龍圖閣學士進承旨兼侍講仁宗親政以其無所附麗擢同知樞密院事實元初特轉戶部侍郎同中書門下平章事集賢殿學士而論登用之由謂卿清忠且乏干請故耳陝西用兵爲中書侍郎加工部尙書兼樞密使明年除昭文館大學士慶曆五年上章請罷拜鎮安軍節度使同平章事封鄆國公判河南尋守司空致仕薨故事乘輿不臨奠帝特往爲贈太尉兼侍中諡文憲皇祐中改諡文簡爲人性淡薄恬然自得居翰林十二年官方倚后勢每遣至必正色待之不交一言在中書八年宗黨親戚一切抑遠然於當世急務模稜無所建明爲御史孫抗所論初閩諺南臺江合

出宰相至是沙湧可涉人以為驗無子從子燾與望之同蔭
燾字質夫父訪由校書郎遷三班奉職燾由孟州司戶察軍試
禮部第一擢知陳留歷提舉陝西常平京東運判提點湖北刑
獄成都路轉運使入為考功員外郎元祐中以直龍圖閣知慶
州與章惇同宗性好興事時朝廷一意戢兵指葭蘆等四砦夏
得之益驕燾言夏人嗜利畏威不有懲艾不得休息宜稍削其
地以固邊圉擇據要害乘便出討以致其師夏果圍環州燾遣
折可適伏兵洪德城與之遇斬獲甚眾又預毒於牛圈潯敵入
馬飲者多死召權戶部侍郎改知同州紹聖初除集賢殿修撰
知應天與廣州從江淮發運使哲宗訪邊事合旨移知滑州奏
築胡蘆河川二城據形勝以備夏陰備板築守戰陽示以怯
熙河秦鳳環慶四路之師出於石門峽江口好水河之陽二

有奇成之賜名平夏城方興靈平砦役夏眾來爭迎擊敗之既
而環慶廊延河東熙河皆相繼築城夏人貽聘因奉其母合兵
數十萬圍平夏城建高車填塹不能克遁去其統軍鬼名阿埋
西壽監軍妹勤都逋皆勇悍善戰燾謀其弛備遣折可適郭成
輕騎夜襲直入其帳執之盡俘其家禽馘三千餘牛羊十萬以
後不復能軍屢乞通和哲宗御紫宸殿受賀始令罷兵擢燾樞
密直學士屢遷龍圖閣端明殿學士進階大中大夫在涇原四
年凡剗州一城砦九薦拔備禪無間廝役可適本降人與李忠
傑朱智用咸受控馭推所立功為西方最徽宗徙知河南入見
拜樞密同知請老終資政殿學士中太一官使贈右銀青光祿
大夫諡莊簡七子 絳由開封推官侍父養遷戶部員外提點
淮東刑獄權知揚州兼提舉香鹽以時鑄崇寧大錢市區晝閉

持錢買物至日肝無肯售幾至大亂見而哀之爲飭市易務以
百貨易小錢檄倉吏糴米麥予以大錢盡十日止民心始安又
言鈔法誤民新鈔既行舊鈔盡廢一時商賈無措自盡觸蔡京
怒奪其官練第進士歷陝西運判入爲戶部員外贊妹婿劉逵
漸復元祐之政亦爲京所惡出知湖州主管西京崇福宮綜歷
通判常州緝知丹徒縣經簽判西京續簽判蘇州孫菱承奉郎
蓋監蘇州稅俱列顯仕遇京復相思傾章氏經居蘇州得私鑄
錢數甕諷言者誣與州人郁寶所鑄遣李孝壽張茂直沈畸蕭
服更往訊無驗別遣孫傑鞠之傳致如法刺配沙門岳籍入其
家竄緝台州綜秀州綜溫州緝睦州續永州菱處州蓋均州并
官司十餘人皆降罷除名時論寃之擢傑龍圖直學士知蘇州
張商英入相始辯前獄移經常州改役內殿崇班綜復朝奉郎

通判秀州遷倉部員外提點兩浙刑獄以龍圖直學士知越州
參譚稹軍宣撫燕山加右文殿修撰後金人破蔚州議稹措置
乖方坐落職會赦恩告老復龍圖直學士致仕卒望之字表
民少孤喜問學志氣弘放爲文辯博長於議論以校書郎監杭
州茶庫母憂毀瘠過制服除值兄拱之知晉江忤守蔡襄誣貶
爲訴於朝復官望之遂不仕覃恩遷大理評事歐陽修韓絳吳
奎劉敞范鎮同薦其才擢建康軍節度判官知烏程俱辭不起
終光祿丞致仕卒平生嘗北遊齊趙南汎湖湘西至汧隴東極
吳會山水勝處無不涉歷有所著救性七篇專宗孟氏排荀楊
韓并李翱之說又非歐陽修論魏梁爲正統著明統三篇復訂
李觀所著論謂仁義智信與樂刑政皆出於禮著禮論一篇其
歌詩雜文又數百篇集爲三十卷人稱其議論有大過人者

晏殊字同叔撫州臨川人自幼以神童薦前後語備載弘道錄帝嘉賞賜

同進士出身復試詩賦論益加稱善擢祕書正字改直史館所

與遊處多知名士陳彭年亟稱許之名試中書遷奉禮郎東封

遷光祿丞為集賢校理外艱起復詔修寶訓從祀太清宮判太

常禮院內艱復求終制不許遷太常寺丞擢左正言昇王府記

室參軍歲中遷戶部員外郎天禧二年八月忽自中批除太子

舍人宰相不知所由次日進見上曰近聞館閣臣僚多事嬉遊

彌日繼夕惟殊杜門與兄弟讀書如此謹厚正可為東宮官名

諭對以臣非不樂宴遊直以貧無可為之具上益嘉其誠實眷

注日深尋知制誥判集賢院久之為翰林學士兼左庶子仁宗

即位丁謂曹利用各欲獨覲奏事殊建言羣臣奏事太后垂簾

聽之皆母得見其議始決遷右諫議大夫兼侍讀學士轉給事

中興修真宗實錄進禮部侍郎拜樞密副使疏論張耆不可任

樞密忤太后旨會幸玉清宮怒持笏者後至撞之折齒為御史

劾罷知宣州改應天自五代以來學校久廢殊始為典舉嚴條

約延師以教生徒江南人知學自殊始也召拜御史中丞資政

殿大學士兵部侍郎參知政事進左丞禮部尚書太后崩罷知

亳州徙陳州俄遷刑部尚書復兼中丞為三司使陝西方用兵

請罷內臣監軍悉授諸將陣圖使得自應敵為攻守計及募弓

箭手教之以備戰鬪又請出宮中長物助邊費悉罷他司領財

利者使還度支俱見施行康定初拜樞密使同中書門下平章

事婿富弼方任副樞堅辭不許慶曆二年改集賢殿學士同平

章事仍兼樞密甚見信遇平居好結賢士而小人權倖皆不便

有言被詔撰宸妃墓誌不言誕育聖躬其實方太后臨朝有所

事

不敢又輔臣例宜借官兵私治僦舍以爲擅役坐是左遷工部尚書知穎陳許三州時謂非辜稍復禮刑二部尚書祀明堂遷戶部尚書以觀文殿大學士知永興軍徙河南遷兵部尚書皇祐間有疾請歸訪醫疾平特留經筵詔五日一與起居儀從如宰相至和初寢劇乘輿將臨視馳奏請免二年正月丁亥薨帝臨奠以不及視爲恨罷朝贈司空兼侍中諡元獻篆其神道曰舊學之碑爲人性剛簡遇人必以誠奉養清儉雖處富貴如寒士然樽酒相對懽如也累典方州吏民畏其惰急其爲文章瞻麗應用不窮尤工詩閑雅有情思晚歲篤學不倦有文集二百四十卷及刪次梁陳以後名臣述作爲集選一百卷于知止朝請大夫

杜衍字世昌紹興山陰人度支員外遂良之子總髮苦志篤學厲操擢第補揚州觀察推官歷著作佐郎知平遙縣通判晉州知乾州以陳堯咨薦詔旌卓異特賜宴勞移權鳳翔二州民邀境上俄除太常博士提點河東刑獄按行潞州屢折冤獄人有誣告知石州王繼昇連蕃族謀變衍廉得其寃抵告者罪寧化軍守將鞠人死罪不以實衍覆正之遷祠部員外郎徙京西路移知揚州復辨疑獄法當賞改刑部章獻后察其治狀轉河東運副陝西運使召爲三司戶部天章閣待制會河北乏軍資選爲都轉運使遷工部郎中不增賦而用足還授樞密直學士求外以右諫議大夫知天雄軍爲治謹密不以威刑督下吏民咸憚其清整仁宗親政召爲御史中丞奏中書樞密古之三事大臣坐而論道者今止隻口對前殿何以盡天下之事宜迭召見賜坐便殿以極獻可替否其他不必親煩陛下又議常平法請

量州郡遠近。戶口衆寡。嚴賞罰。課官吏出納。無壅增損。有無公糴。未充。則禁爭糴。以規利者。糴畢而儲之。復察其以供軍爲名。而假借者。州郡闕母錢。願出官帑助之。皆見裨益。判吏部流內。銓先因科格繁長。主判不能悉。吏多受賕。出縮爲奸。衍救吏盡。兩銓法。閱視本末。悉自與奪。雖有賄莫能行。遂聲動京師。改知審官院。其裁制如判銓時。遷工部侍郎。知永興軍。捕盜得民亡婦。并殺他婦屍。二秦人大驚。徙并州。加龍圖閣學士。寶元二年。轉刑部侍郎。復知永興。民方苦用兵。調發吏緣爲奸。衍區處計。畫量道里遠近。爲寬期會。使民次第輸納。比他州費省過半。召還。權知開封。貴近斂跡。康定初。拜同知樞密院事。改副使。夏竦欲攻守宰相。欲用出師之策。衍謂僥倖成功。非萬全計。爭議久。求罷。手詔敦勉。徙河東。宣撫使尋轉吏部侍郎。拜樞密使。內

降恩。率寢不行。積至十數。封納帝前。帝語諫官歐陽脩曰。外人徒知杜衍封還內降。不知凡有求於朕。以衍不可而止者。更多於所封還也。契丹與元昊戰。宣撫范仲淹請以兵從。衍爭議。帝前謂二國交鬪。勢必不來。我兵不可妄出。仲淹嘗父事衍。至語甚切。未嘗恨之。帝問契丹。婿劉三嘏歸。歎朝議厚館以詰敵。陰事衍曰。中國主信義。若違誓納叛。不直在我。且彼堂堂近親。逋逃來歸。謀身若此。謀國可知。納之何益。不受還之。拜同平章事。集賢殿大學士。兼樞密使。好薦引賢士。推獎後進。一時知名之士多出其門。沮止僥倖。小人多不悅。言者攻仲淹富弼。帝欲罷其政事。衍常左右之。御史并劾衍。婿蘇舜欽。伎樂娛賓。及所知王益柔。戲作傲歌。因以危衍。罷爲尚書左丞。出知兗州。丁度草制言。其朋比然。衍平日議論實無是情。以度嘗求大用。爲孫

甫所奏甫使契丹度力求置對衍寢其事銜之故也慶曆七年
乞骸賈昌朝因與不諧遂以太子少師致仕時議故相一上章
卽允且以孤階皆非故事皇祐元年加特進太子太保陪祀明
堂詔有司敦遣就道都亭設帳具几杖待之稱疾固辭加太子
太傅賜子同進士出身又進太子太師詔王洙存問封祁國公
爲人勤儉好學自少清羸若不勝衣年過四十鬚髮盡白立朝
峻節凜然不可屈性復清介不殖私產退寓南都第室卑陋纔
數十楹而已出入簡素烏帽綈袍晏如也或勸爲居士服辭曰
壯而叨榮老仍謝事尚可竊高士名耶居家見賓客必問時事
聞有善言若已出至其所不可則憂見于色或夜不寐如任其
責者善爲詩楷書行草皆有法嘉祐元年病遣使挾醫往視不
及二年二月壬戌薨年八十戒其子努力忠孝歛悉從儉小壙

庠冢遺疏不及私略曰無以久安而忽邊防無以既富而輕財
用早建儲副以安人心贈大司馬兼侍中諡曰正獻

賈昌朝字子明真定獲鹿人從曾祖緯晉史官伯祖琰字季華
父偉晉中書舍人給事中以蔭授官太宗尹京奏爲推官居幕
府勤於所職風神峻整有吏幹卽位超拜左正議大夫樞密直
學士三司副使卒兄弟五人皆相繼亾琰拊循孤幼聚族百口
庭無間言昌朝天禧初真宗祈穀南郊獻頌名試賜同進士出
身主晉陵簿賜對便殿除國子監說書孫爽稱其講說有法若
唐路隨韋處厚乃用經術擢穎川郡王府伴讀遷殿中丞歷知
宜興東明二縣爽老薦以白代名試中書上言禮母之諱不出
宮闈今章獻服除猶諱其父名非所以尊宗廟也詔從之景祐
中授崇政殿說書帝多所質問講說明白請記錄以進賜名邈

百口庭無間言

英延義記注加直集賢院舉易所言洊雷震君子以恐懼修省
今太平興國寺災旦夕大雷震電此殆天心示警可勿繕治以
示畏天愛人之意又西域僧獻佛骨銅像請悉加賜遣還帝行
其言天章閣初置侍講首以命之遷禮部郎中史館修撰時議
收劉平家賜石元孫死昌朝言漢族李陵有後悔先帝厚撫王
繼忠家終得其用咸得免擢知制誥權判流內銓請槩舉小縣
令不限以俸進龍圖閣直學士權知開封遷右諫議大夫權御
史中丞兼判國子監議者欲以金縉昭契丹使攻元昊昌朝言
設若有功則責報無窮矣力止之因上言方今國家削方鎮太
過用恩倖太驟如楊崇勳李昭亮望速遷士代之其有功宿將
無數更易刺史以上宜慎所授以待有功又上備邊六事馭將
帥復土兵訓營卒制遠人綏蕃節謹規候書奏多施行之復請

度經費罷不悉詔與三司合議朝臣年七十有功狀可留者勿
拘耄不任事者令致仕歲所省幾百萬慶曆三年拜叅知政事
言用兵以來民力困敝請詔諸路轉運毋得承例折變科率須
科折者悉聽奏裁雖奉旨及三司文移於民不便者亦得上聞
五年命代杜衍以工部侍郎拜同中書門下平章事集賢殿大
學士兼樞密使居兩月進昭文館大學士監脩國史議升祔三
后章獻母儀天下章懿誕育聖躬宜如元德皇后故事升祔章
惠特慈保之恩依舊別享奉慈廟從之元昊款附罷兼樞密六
年日食帝諭輔臣願歸罪朕躬卿等宜究民疾苦思所以利安
之又曰人主懼天脩德猶人臣畏法而自新也皆頓首謝明年
春旱復引故事乞罷未許俄欲貸向綬獄與諫官吳育爭議不
決中丞高若訥因奏大臣喧訟不肅故雨不時若隨罷育除昌

朝武勝軍節度使檢校太傅判大名兼北京留守河北安撫使
賜銀飾肩輿尋以討貝賊功移山南東道先是契丹聚亾卒勇
悍者號投來南軍以戰夏人而邊法卒亾自歸者死昌朝特爲
變法寬之歸者稍衆因廉知契丹事邊人與契丹交質地致邊
界不靖爲立法以後主不時贖人得而贖之歲餘地悉復舊然
坐三司使葉清臣移用河北庫錢格詔不與徙判鄭州過闕留
爲祥源觀使拜尚書右僕射觀文殿大學士判尚書都省班及
儀物視宰相歲中求外復除山南東道固辭僕射待中改同平
章事母喪服除判許州召對邇英閣命講乾卦奏聖人外以剛
健災事內以謙恭應物不敢自矜爲天下首乃右手詔優獎以
將相待講天下盛事又言漢唐都雍置三輔內翼京師朝廷都
汴而近京諸郡皆屬他道不稱請析京東之曹州京西之陳許
滑鄭皆隸開封以四十二縣爲京畿從之將行命餞于資善堂
改判大名兼河北安撫時河決商胡請復故道不從語在河渠
志六塔功敗賓棣德博民多死拯之甚力內侍劉恢往視還言
河決趙征村與帝名嫌不祥時謂昌朝使之以攝當國者嘉祐
元年進封許國公兼侍中尋復樞密使三年彥博請罷臺諫陳
升之等恐其代之乃攻昌朝結宦官宮人創建大第矯制者輒
不問罷爲鎮安軍節度使兼景靈宮使復判許州又轉保平軍
陝州大都督府長史兼大名府安撫使英宗卽位徙鳳翔節度
使加左僕射進封魏國公治平元年以侍中守許州力辭弗許
明年以疾留京師卒年六十八謚文元御書墓碑曰大儒元老
之碑所著羣經音辨通紀時令奏議文集百二十二卷昌朝在
侍從得名譽及執政乃不爲正人所與數有攻其結宦官宮人

者子章館閣校勘蚤世青朝請大夫伯祖琰字季華晉中書舍人偉之子以蔭授臨淄雍丘主簿歷通判澧州太宗尹京奏以爲開封府推官加左贊善大夫及卽位超拜左正議大夫未幾擢三司副使風神峻整有吏幹佐太宗居幕府凡五年勤於所職昆弟五人琰最幼諸兄相繼死琰拊循孤幼聚族凡百口分給衣食庭無間言士大夫以此稱之太平興國二年卒子湜至軍器庫使交趾黎桓之篡朝命孫全興將兵往討湜掌軍事黎桓僞降全興信之遂北湜坐失律誅次汾至殿中丞湜子昌符賜同學究出身汾子昌齡第進士爲屯田員外郎昌朝弟昌衡字子平舉進士爲梓州路轉運判官賈人請富順井鹽吏視賄多寡爲先後昌衡一隨月食給之瀘州邊彝蠻故時守以武吏昌衡請由東銓調選徙提點淮南刑獄廣東轉運使徙兩

浙路熙寧更法昌衡數言利害神宗獎其論奏忠益召爲戶部副使提舉市易司課羨增秩右諫議大夫加集賢殿脩撰知河南府歷陳鄆應天府鄧州以正議大夫致仕卒從子炎字長卿以昌朝蔭更歷倉庫積進至工部侍郎政和中以顯謨閣待制知應天府徙鄆州永興初陝西行鐵錢久幣益輕蔡京設法盡歛之更鑄夾錫錢幣稍重京去相鐵錢復行童貫又令盡廢夾錫民益以爲苦炎徙知延安四表言錢法屢變人心愈惑今人以爲利者臣見其害以爲是者臣見其非中產之家不過畜夾錫錢一二萬旣棄不用則惟有守錢而死耳邊吐生理蕭條官又一再變法鄆延去敵迫近民殊不安民不安則邊不可守願得內郡以養母乃命爲潁州未行復留與貫制疆事不合貫沮之改河陽又改鄧州加直學士知永興入對留爲工部侍郎

貫簽書樞密院炎獨不能賀會以疾卒年五十八贈銀青光祿大夫

弘簡錄卷一百之三終

弘簡錄卷一百之三

明刑部員外郎仁和弘齋邵經邦學

皇清翰林院侍講學士四世孫遠平校閱

宰輔 宋二之五

文彥博

宋庠

子均國九國孫喬年曾孫昇

龐籍

孫恭

梁適

父穎兄固孫子美

陳執中

劉沅

子璣

曾公亮

子孝寬孝廣孝蘊從子孝序

文彥博字寬夫汾州介休人其先本敬氏以避諱改少從穎昌史照學照母異之曰貴人也待之甚厚及進士第知翼城縣通判絳州為監察御史轉殿中侍御史西方用兵彥博言偏校有臨陳不用命者大將請得以軍法從事不待中覆仁宗是之黃德和誣劉平降敵以金帶賂平奴使證其說平家二百口皆械繫詔彥博置獄河中鞠治得實德和謀翻獄遣他御史來彥博

拒不納曰。朝廷慮獄不就。故遣君。今案具矣。宜亟還。德和并奴卒就誅。以直史館爲河東轉運副使。鄜州節道回遠。銀城河外。有唐時故道。廢弗治。彥博父洎常爲轉運使。謀復之。未及而卒。彥博成父志。盡復故道。益儲粟。元昊來寇。圍城十日。知有備。解去。遷天章閣待制。都轉運使。進樞密直學士。知泰州。改益州。拜樞密副使。參知政事。具州王則反。明鑑討之。不克。命彥博爲宣撫使。旬日賊潰。檻則送京師。拜同中書門下平章事。薦張瓌。韓維。王安石等。恬退守道。乞褒勸。以厲風俗。與樞密使龐籍議省兵。凡汰爲民及給半廩者。合八萬。論者紛然。訖不爲。阻御史唐介劾彥博在蜀日。以奇錦結宮掖。因之登用。介既貶。彥博亦罷。爲觀文殿大學士。知許州。改忠武軍節度使。知永興軍。至和二。年。召復相位。與富弼同拜。因言頃者。唐介言事多中。臣病其間。雖有風聞之誤。治之太深。時人莫不稱其厚德。明年帝正旦。受朝。疾暴作。扶入禁中。呼內侍史志聰問狀。志聰不言。彥博叱曰。爾曹不令宰相知。天子起居欲何爲耶。自今疾勢增損。必以告。不爾當行軍法。又與同列謀啓醮大慶殿。因留宿殿廡。志聰辭以無故事。答曰。此豈論故事耶。有禁卒誣告都虞候爲亂。知開封王素夜叩宮門。不使入。明旦言狀。劉沆欲捕治。彥博召都指揮許懷德問都虞候何如。人懷德言其謹愿。可保。彥博曰。是卒有怨誣之耳。當亟誅以靖衆。乃請沆判狀尾。遂斬。卒內侍武繼隆陰受留守賈昌朝約。令司天二人抗言富弼不當用。李仲昌策穿六潔渠。以致上體不安。彥博知其意。漫曰。彼本不敢妄言。有教之者耳。後數日。繼隆又教二人請皇后同聽政。志聰白其狀。彥博密懷之。徐召二人詰曰。天變職所當言。何得輒預國家

大事汝罪當族二人懼謝彥博曰觀汝真狂愚耳未忍治汝罪後勿復然已乃出狀示同列皆憤怒曰何不斬之答曰斬之則事彰灼於中宮不安皆曰善既而遣定六潔方位復使二人往二人恐治前罪更言六潔在東北非正北也帝疾愈始歸第沈密白彥博擅斬告反者彥博以沈判呈帝意方解嘉祐三年罷政以河陽三城節度使同平章事判河南封潞國公改鎮保平判大名又鎮成德遷尚書左僕射判太原內艱去位初帝疾時彥博等疏請建儲帝許之既而後宮將有就館者故其事緩英宗卽位詔起復不就服闋入覲論曰朕之立皆卿功也彥博竦然謝曰陛下入繼大統乃先帝聖意皇太后協贊臣何功之有况陛下登儲纂極臣方在外顧何與焉帝曰備聞始議卿於朕有恩尋除侍中徙鎮淮南判永興軍治平二年入爲樞密使領

節劔南西川神宗卽位詔以朝廷宗臣令班陳升之上以稱遇賢之意固辭曰國朝樞密無班宰相上者臣忝知禮義敢效曹利用以紊朝著乃止俄授檢校司徒兼中書令上嘗謂當今理財最爲急務養兵備邊府庫不可不豐大臣宜共留意時安石希旨用事夏人犯大順慶帥李復圭命鈐轄李信等出戰而敗獨奏信罪曲誅之秦人以爲冤慶兵遂亂彥博上言朝廷行事務合人心宜兼采衆論以靜重爲先陛下厲精求治而人心未安蓋更張之過也祖宗法未必皆不可行但有偏而不舉之弊耳安石知爲已發奮然排之曰求去民害何爲不可若萬事隳隍乃西晉之風何益於治御史張商英附安石撫樞密他事以搖彥博坐不實貶在樞府九年常極論市易司監賣果核與下民爭利損國斂怨致華嶽山崩安石詆之遂力引去拜司空河

東節度使判河陽徙大名身雖在外而眷注有加判官汪輔之
新進奏其不事事帝抵其奏曰本以侍中舊德故煩臥護北門
細務不必勞心遂罷輔之初選人李公義請以鐵龍爪治河宦
者黃懷信沿其制爲濬川杷天下指以爲笑安石獨信之都水
丞范子淵奏用杷之功本歸故道退出民田數萬頃詔下核實
彥博言河非杷可濬臣不敢雷同罔上帝不悅尋加司徒元豐
三年拜太尉復判河南七年二月甲戌入朝賜宴垂拱殿王同
老復言至和中議儲嗣事神宗又問彥博如前對帝曰雖云天
命亦繫人謀卿深厚不伐陰德如丙吉真社稷臣也三月辛丑
將行賜宴瓊林苑遣中謁者遺詩祖道當世榮之王中正經制
邊事所過稱密旨募禁兵彥博獨以無詔拒之遂去久之請老
以太師致仕居洛陽元祐初宣仁臨朝恩禮尤渥將用爲三省
長官言其太重乃以平章軍國重事凡居五年復致仕紹聖初
降太子少保薨年九十二後預黨籍政和五年追論定策功特
命出之追復太師諡忠烈爲人凝簡莊重顧盼有威逮事四朝
洊更二府徧歷公孤七換節鉞五十餘年雖窮貴極富而平居
接物謙下尊德樂善如恐不及邵雍二程皆以道自重賓接之
如布衣交建洛陽耆英會與富弼司馬光以下十三人置酒賦
詩相樂序齒不序官熙寧中妖尼惠普就逮公卿多與簡牘彥
博獨無帝問之答曰臣但不知如知之亦不免人皆服其能分
謗神宗導洛通汴而主者過絕洛水不使人城洛人患之因中
使劉惟簡以聞詔令通行如初遂爲無窮之利八子恭祖貽慶
齊賢保雍居中及甫維申宗道皆歷要官惟及甫最顯以興同
文館獄誣證元祐大臣士論少之

開曰碩德耆英不念舊惡俾壽而康五福綿絡如斯人者
吾所願學

宋庠字公序開封雍丘人高祖紳唐御史中丞曾祖駢漢乾封
令祖耀周霍丘令父杞端拱二年明經及第治獄有陰德終荆
南節度推官母鍾氏禱于廬阜夢道士授以書曰以遺爾子視
之小戴禮也已而生庠少篤學遭父喪寓家安州夏竦見而器
之天聖初第進士除大理評事同判襄州名試遷太子中允直
史館歷三司戶部判官同修起居注再遷左正言坐伏閣爭郭
后事罰金久之知制誥上言今策賢良茂才等科乃與武舉人
雜試非所以待天下士宜如故事命有司設幕次具飲膳令武
舉人就別試詔從之兼史館修撰知審刑院密州豪王泚犯私
釀鄰人往捕泚給奴曰盜也使盡殺之州論奴以法泚獨不坐

庠力爭之抵泚死會災異言上天示警所以戒政事今惟開寺
觀爲民祈福恐非所以致嘉應也改權吏部流內銓尋陞員外
郎上遇之厚拜翰林學士庠初名郊李淑恐其先用以奇中之
曰宋受命之號郊交也合姓名言之爲不祥上乃令改今名寶
元二年加右諫議大夫參知政事嘗論唐入閣儀奏云唐有大
內大明宮在其東北謂之東內高宗以後天子多居大明宮其
正南門曰丹墀第一殿曰含元大朝會則御之第二殿曰宣政
謂之正衙朔望大冊拜則御之第三殿曰紫宸謂之上閣亦曰
內衙隻日常朝則御之天子坐朝須立仗於正衙或止御紫宸
卽喚仗自宣政殿兩門入是謂東西上閣門也以本朝宮殿視
之宣德門唐丹鳳門也大慶殿唐含元殿也文德殿唐宣政殿
也惟紫宸殿同但其制度南北不相對爾今欲求入閣本意施

於儀典。須先立仗。文德殿庭。如唐制。喚仗。自東西閣門入。如此則差。與舊儀合。又按唐自中葉。以還。雙日及非時。大臣奏事。別開延英殿。若今假日。御崇政。延和是也。乃知唐制。每遇坐朝日。卽爲入閣。其後正衙立仗。因而遂廢。甚非禮也。庠旣自以材術受知。進用天下事。有未便者。數論上前。因爲夷簡所忌。指爲朋黨。出知揚州。未幾。以資政殿學士徙鄆州。進給事中。慶曆五年。復召爲樞密副使。七年春。旱例免爲右諫議大夫。夏。竦因陳執中爲相。不學少文。勸上召二府對資政殿。手詔策以時事。欲因困之。庠言兩漢對策。本延巖穴草萊之士。今令政府大臣效之。非所以尊朝廷。請至中書合議。條奏時以爲知體。明年除工部侍郎。充樞密使。皇祐元年。拜兵部尚書。同中書門下平章事。集賢殿大學士。上欲用張堯佐爲使相。庠執不可。會張彥方僞官事。露庠子與之遊。包拯奏其輔政無所建明。且不戢子弟。罷爲刑部尚書。觀文殿大學士。知河南。徙許州。河陽。再遷兵部尚書。朝京師。時上疾。少間。臣下希聞德音。及覲。特賜坐。勞問嘉祐三年。復拜檢校太尉。同平章事。充樞密使。封葛國公。數言國家慎固根本。畿輔宿兵常盈四十萬。羨則出補更戍。祖宗初謀。不可輕改。旣又與樞副程戡不協。五年。以河陽三城節度。同平章事。判鄭州。徙相州。上章請老。英宗卽位。移鎮武軍。改封鄭國公。論以初臨天下。未忍遽從命。判亳州。前後所歷。以慎靜爲治。及晚頗浮沈。自安人多言其昏惰。尤愛信幼子與匪人。遊呂晦。請救絕其子。從宦。帝憐其老。不許。累階開府儀同三司。勳上柱國。以司空致仕。薨。年七十一。贈太尉。兼侍中。諡元獻。帝爲篆神道碑。曰忠規德範。爲人端直。清畏性復。儉約不好聲色。進止皆有法。

度卽上有所問必據經以對退未嘗與人言或薦引人材惟恐其間接賓客壘壘論文不少休早以名擅天下至老猶不輟有文集四十卷又校定國語補音三卷輯紀年通譜區別正閏爲十二卷及掖垣叢志尊號錄 子均國國子博士充國刻意問學以寄理罷舉仁宗名試學士院賜進士出身簽書河南判官判登聞鼓院知太常禮院英宗祔廟議者欲祧僖祖藏夾室充國請配感生帝爲宋始祖從之東西府建上二箴以戒大臣不憚會廟饗宿齋其妻遣兩妾至自劾以大中大夫致仕卒爲人性剛介孝於奉親平居得微物必先薦家廟乃敢嘗 孫喬年字仙民以蔭監市易坐女謁失官落拓二十年女嫁蔡攸京當國復起用崇寧中提舉開封縣鎮府界常平改提黠京西北路刑獄賜進士出身加集賢殿修撰京畿運副進顯謨閣待制爲

轉運使至開封尹復以龍圖閣學士知河南京罷貶保靜軍節副蘄州安置京復相還舊官爲戶部郎中知陳州卒年六十七 曾孫昇字景裕崇寧初由譙縣尉爲勅令刪定官數年至殿中少監父子依憑蔡氏陵轍士夫陰交諫官蔡居厚爲鷹犬以徽猷閣待制知陳州未幾知應天爲京西都運蒞葺西宮及修三山新河擢顯謨閣學士徽宗議謁諸陵有司預爲西幸之備昇治宮城廣袤十六里創廊屋四百四十間費不可勝至灰人骨爲髹漆胎盡發洛城外古冢與衣冠壘九遷正議大夫殿中監又命補治三陵泄水坑澗計役四百九十萬士卒贈金紫光祿大夫延康殿學士

龐籍字醇之單州武城人曾祖武祖文進父格皆贈官籍登祥符進士爲黃州司理參軍知州夏竦器其材調開封兵曹知府

薛奎薦為法曹遷大理丞知襄邑預修天聖編敕歷刑部詳覆
官羣牧判官轉對言四事一內侍楊懷敏不當借帶甲馬雖羣
牧覆奏仍復借之二百官奏事止送中書密院近歲璽書內降
寢多無以防杜倖門三作坊料物庫主吏盜官物逃避以宮掖
親遽罷追究四祥符令凡檢下嚴省吏相率去坐免若是則清
蠱者沮矣久之出知秀州召為殿中侍御史章獻太后崩遺詔
楊太妃議軍國事籍請下閣門取垂簾儀燔之仁宗親政奏用
人宜辨邪正防朋黨採公論毋令出於執政孔道輔以其言事
不觀望宰相意稱為天子御史擢開封判官論尚美人遣內侍
稱教旨免宮人市租自祖宗來未有此制帝聞之詔杖內侍自
今宮中傳命毋得輒受遷祠部員外郎殿中侍御史劾范諷罪
坐貶籍亦降太常博士知臨江軍尋徙福建轉運景祐三年復

侍御史改知雜事判大理寺進天章閣待制元昊反為陝西
量安撫使坐令府吏馮士元市女口降知汝州徙同州就除陝
西都轉運使建言頻歲災異天久不雨宮中費用奢靡山納不
嚴須索煩多有司無從鈎校矧今宿兵西鄙將士力戰弗獲功
賞而內侍醫與樂官無功享賜願通加裁損體先帝修德弭災
之意賊寇不足平也進龍圖閣直學士知延州俄兼鄜延都總
管經略安撫兼提招討等使明年換左諫議大夫自元昊陷金
明承平塞門安遠栲栳諸砦又破五龍川邊民焚掠殆盡籍至
稍葺治之戍兵十萬無壁壘皆散處城中畏籍莫敢犯法金明
西北有渾州川土沃衍川尾曰橋子谷寇出入之隘籍使部將
狄青將萬餘人築招安砦于谷旁募民耕種贍軍又使周美襲
承平砦王信築龍安砦悉復所亡地築十一城及開平戎道通

永和烏仁關更東西陣法爲方陣損益兵械元昊遣李文貴齎書送欵籍疑爲詐益屯兵青澗城後數月果寇定川召文貴開諭遣去旣而旺榮又以書來會帝厭兵欲招懷之遣籍報書呼旺榮爲太尉籍奏陪臣當此又可臣其主哉仍因彼官名稱爲謨寧令從之會又改名曩霄遣賀從勗來稱男不稱臣籍不敢聞送詣闕下因矣羌久不通和市國人愁怨今辭理寢順必有改事中國之心請遣使者申諭朝廷采用其策卒臣元昊召爲樞密副使時公私困於用兵籍請併省官屬退近塞之兵就食內地頗省邊費慶曆八年拜參知政事皇祐初轉工部侍郎爲樞密使三年以戶部侍郎同中書門下平章事昭文館大學士監修國史皆近時入相未有乃殊恩也狄青討儂智高韓絳謂武人不宜獨任宣撫帝以問籍言若副以文臣則號令不專不

如不遣益詔嶺南諸軍受青節度旣而捷書至帝歸功於籍又欲以青爲樞密使同平章事力爭不聽嶺南平推恩六百九十一人時以爲過有齊州學究皇甫淵捕賊有功當賞因賂遺道士趙清况與堂吏復爲絳諭劾罷知鄆州數月加觀文殿大學士昭德軍節度使知永興軍改并州密疏擇宗室之賢者爲皇子其言甚切坐擅聽麟州築堡白草平州將武戡等爲夏人所掩罷節度以戶部侍郎徙知青與定州告老加太子太保致仕封穎國公嘉祐八年三月戊申薨年七十六仁宗不豫不果臨遣使弔賻英宗贈司空加侍中諡莊敏爲人曉律令長於吏事持法深峭軍中有犯斷斬劓磔累嘗至死以故士卒畏服治民頗有惠愛及爲相聲望減于治郡時五子元魯登第爲大理丞早卒元英朝散大夫太常博士元中右贊善大夫元常元直皆

大理丞 孫恭孫字德孺陰補施州通判素貪縱在西南二十年崇寧中開邊城所得州縣實不毛地多張虛名褒遷徽猷閣待制至直學士蜀人病之

梁適字仲賢東平人高祖涓武城主簿曾祖惟忠以明經至天平軍節度判官祖文度早世父顯依王禹偁學大加器賞屢試不第獻疏略曰當今所取不出於詩賦小技喜棄隨人寧無濫陟枉黜之患以今丘園之下宏才茂德之士誠能擢以異等俾陳古今治亂君臣得失生民利害賢愚川舍庶幾有益于治雍熙二年始狀元及第解褐大名推官召為右拾遺直史館判登聞院坐翟馬周事貶虢州司戶叅軍起為大理評事知魚臺縣遷殿中丞歷開封推官三司關西道判官轉太常博士內艱起復改右司諫真宗初使陝西作聽政箴以獻還為度支判官咸

平元年同知貢舉錢若水表同修太祖實錄并起居注扈蹕大名陳言邊務兵法曰罰之不行譬如驕子之不可用昨者傅潛奉明詔握重兵逗撓無謀守陴玩寇願加明罰仍于邊將中擇其武勇謀略者十人入付騎士五千輕齎糗粳遇有寇兵隨時掩捕緣邊州郡烽燧相望遇游騎掩殺隨即救援如此則乘城者不堅閉壘門坐觀勝負捍邊者不苟依郡郭往復有期時論稱之三年擢知制誥賜金紫王均平為峽路安撫使歸掌三班院代韓國華判大理四年副張齊賢使關右有吏才每進對詞辯明敏真宗嘉之凡羣臣上封者付顯洎薛暎詳閱可否又與暎分為河北東西路巡檢使察民饑盜還拜右諫議大夫翰林學士同知審官院景德元年權知開封卒年九十二生平美風姿彊力少疾閨門雍睦與人交久而無改士大夫多之 適少

孤嘗輯父遺文及所自著以進真宗覽之曰顯不孤矣授秘書
正字知崑山徙梧州更舉進士知淮陽軍奏滅京東預買紬百
三十萬論景祐赦書不當錄朱梁後仁宗記其名名爲審刑院
詳議官駁梓州人白彥歡依鬼神詛說殺人甚于金刃止野鳥
集端門此非國瑞與同院燕肅奏何次公案帝問漢時亦有字
次公者肅不能對適舉蓋寬饒黃霸二人字帝嘉其博覽因詢
家世益器之拜右正言疏林瑀不當由中旨除天章閣侍講夏
守贇爲將無功不宜復典宥密值婦黨任中師執政以親嫌改
直史館修起居注使陝西條邊機十餘事進知制誥權發遣開
封府歲餘出知兗州募人治萊蕪鐵冶民得不病頻歲課溢遷
樞密直學士知延州告歸治葬過京師得入見自言前被朋黨
擠逐留爲翰林學士御史劾之以侍讀學士出知澶與秦州復


知審刑院皇祐初擢樞密副使因帝怒臺諫論張堯佐奏以論
事乃職所當然堯佐恩遇實過恐非所以全之遂奪二使又因
儼智高嫚書求邕桂節度帝將許之適奏言若爾則嶺表之外
非復朝廷有矣議遣狄青致討及平帝語適曰向非卿言南方
安危未可知遷叅知政事契丹欲易國書稱南北朝適奏宋號
乃受之于天何可改易契丹本其國名無名何以立國五年進
同中書門下平章事集賢殿大學士大璫王守忠求爲節度適
持不可張貴妃治喪皇儀將以爲園陵使適又言國朝以來無
此制與陳執中不合御史馬遵吳中復論茶商納交子弟出判
官李虞卿罷知鄭州加觀文殿大學士知秦州初建古渭砦間
爲屬羌所鈔益兵拒守復以驚疑罷之其牛酒論勞其人後不
爲患徙永興軍夏人盜耕屈野河西田累年朝廷欲正封除爲

定國軍節度使知并州至則悉復侵地六百里選知河陽領忠
武昭德二鎮檢校太師以太子太保致仕熙寧三年進太傅卒
年七十贈司空兼侍中諡莊肅適曉暢軍法臨事有膽力而多
挾智數不為清議所許兄固字仲堅幼有志節嘗著漢春秋
父器賞之舉服勤詞學科擢甲第解褐將作監丞同判密州除
著作郎直史館賜緋歷戶部勾院判官卒年三十三為人氣調
俊爽善與人交疎財慷慨尚氣義明於吏道三司馬元方臨事
巖率撫其曠闕之狀屢請條對奉詔鞫獄時稱平審天禧大禮
成奏頌甚工孫子美紹聖中提舉湖南常平希時旨復役法
獨先詣路累遷直龍圖閣河北都轉運使有幹才所至辦治然
縱侈殘虐傾漕計奉上罪緡錢三百萬令契丹市北珠以進擢
為戶部侍郎北珠出女真契丹嗜利虐使捕海東青以求珠兩
國之禍蓋始於此蔡京怒尚書會孝廣擢以代之大觀初拜中
書侍郎踰年罷宣和二年為開府儀同三司復領戶部卒贈少
保

陳執中字昭譽恕子任秘書正字累遷衛尉丞知梧州上復古
要道三篇真宗異而召之時上春秋高莫敢言建儲者復進演
要三篇以蚤定天下根本為說翌日以示輔臣稱善久之擢右
正言逾月立皇太子遂寢寢向用俄坐御試進士卷差謬貶監
岳州酒務無何轉殿中丞通判撫州復右正言曹利用壻盧士
倫除福建運使憚遠不行改京東執中劾奏之利用挾私忿出
知漢陽軍及利用得罪召為羣牧判官權三司鹽鐵知諫院提
舉諸司庫務以工部員外郎兼御史知雜同判流內銓遷三司
戶部副使明道中安撫京東進天章閣待制還知應天徙江寧

揚州再遷工部郎中改龍圖閣直學士知永興軍寶元初拜右
諫議大夫同知樞密院事元昊寇延州咨訪方略奏言今賊勢
方張宜靜守以驕其志畜銳以挫其鋒增土兵以備守禦省騎
卒以減轉餽然後徐議盪平改張節度更須主張將臣橫議不
入則忠臣盡節矣康定初議刺土兵久不決罷為資政殿學士
知河南慶曆元年轉知永興軍為陝西馬步軍都總管加工部
侍郎與夏竦議邊事多異同詔令互出巡邊屯於涇州令諸部
焚除水草寇來無所藉復表言兵尚神密千里稟命非所以制
勝宜密屬四路以權各保疆圉朝議善之求解兵柄就知陝州
徙青州沂卒王倫叛趨淮南執中遣巡檢傅永吉追殺之采石
磯四年召拜參知政事諫官孫甫蔡襄等爭言其剛愎不學若
任以事天下不幸帝不聽遣使馳賜敕告五年擢同中書門下

平章事集賢殿大學士兼樞密使西夏納款請解樞密以春旱
罷政降給事中踰月加昭文館大學士監修國史皇祐初以疾
請外拜兵部尚書觀文殿大學士知陳州久之轉集慶軍節度
使同平章事判大名河決商胡乘年豐調丁夫增築二百里以
障橫潰名為吏部尚書復相位每朝退卧中書東便門以防漏
泄奏罷權勢所引三司勾當公事及監場務官內外蕭然會張
貴妃喪從王洙石全彬徇用非禮追問為后治喪皇儀殿又執
中有嬖妾笞小婢出外舍死于是御史趙抃執政歐陽修諫官
范鎮中丞孫抃與其屬郭申錫等合班論奏罷為鎮海軍節度
使判亳州踰年辭節復拜尚書左僕射封英國公以疾就第加
司徒進岐國公致仕卒贈太師兼侍中在中書八年人莫敢干
以私四方問遺不及門惟殿前都指揮郭承祐數至其家及議



謚禮官韓維言其以公卿子。遭世承平。因緣一言。遂至貴顯。既秉大政。不能秉道率禮。正身齊家。追冊張貴妃位號。於宮闈有嫌。建廟用樂。踰祖宗舊制。此不忠之大者。閨門之內。禮分不明。正室疎薄。庶妾悍逸。已獨杜門深居。謝絕賓客。曰我無私黨。豈不陋哉。請謚榮靈。後改恭襄。詔謚曰恭帝。篆神道碑曰褒忠之碑。子世儒。官國子博士。坐妻與羣婢謀殺所生母棄市。

劉沆字冲之。吉州永新人。祖景洪。事楊行密。為江西衙將。有彭玕者。據州自稱太守。以兵脅景洪。欲附湖南。景洪偽許之。得全一州。以歸。行密遂隱居不仕。嘗自稱不從玕。玕活幾萬人。後世當有興者。因名所居山曰後隆山。山有故相牛僧孺讀書堂。卽舊趾。築臺曰聰明臺。父素亦不仕。以財雄里中。母夢牛。相公來已而生沆。及長。倜儻有氣槩。天聖八年登第。為大理評事。通判

舒州。章獻太后建資聖浮圖。內侍張懷信督役。嚴峻沆奏罷之。遷太常丞。直集賢院。出知衡州。有尹姓大戶。為偽券以欺孤幼。訟久不直。沆詢其父死已久。鄰證安得。皆在。遂劾伏遷太常博士。歷三司度支戶部判官。同修起居注。擢右正言。知制誥。判吏部流內銓。使契丹。坐酒間罵詈。降知和州。改江州。值蠻寇鄧和尚誘溪洞諸蠻。以擾湖湘。陞為右諫議大夫。龍圖閣直學士。知潭州。兼安撫使。許便宜從事。至卽募上兵。使保地。分遣提點楊旼等八路入討。斬獲并招降者萬餘賊。平召還。已而餘黨復叛。殺裨將胡元降。知鄂州。遷給事中。還知審刑院。有張彥方者。受富民金。為偽誥。赦事敗。論死。彥方客張貴妃母。越國夫人錢氏家。時妃有寵。沆受辭不及。越國妃德之。皇祐三年。遷工部侍郎。參知政事。包拯論劾不聽。妃薨。追冊溫成皇后。沆為監護。改

引簡錄 卷一百三 古
園陵使拜同中書門下平章事集賢殿大學士臺諫孫抃范師
道母澁交論不報時二府任官多用例沆陳三弊其一近臣保
薦皆浮薄不堪權豪之流相交汲引有司因以貿易遂使省府
要職臺閣華資路分監司邊防寄任授非公選多出私門况職
掌吏人選補無常或減選出官超資換職堂除便家先次差遣
之類紛紛不一其弊難勝其二審官三班院當入川廣乃求近
地當入近地又求在京及堂除升涉省府館職檢討之類近臣
親屬悉多陳句其三敘錢穀管庫之勞捕盜昭雪之賞常格雖
存僥倖尤甚往往干進於法雖輕于例則厚執政者不能持法
多以例敘進之願詔中書樞密凡三事毋用例事雖施行衆頗
不悅尋如舊文彥博富弼復相遷沆兵部侍郎位在弼下以非
故事改監修國史沆既深疾言官因言自慶曆後臺諫強橫朝

廷命令事無當否悉論之必勝而後已專務抉人陰私莫辨之
事以中傷士大夫執政畏其言進擢尤速請舉行御史遷次之
格滿二歲者與知州遂出范師道趙抃等中丞張昇等言沆挾
私適狄青亦因御史言罷知陳州沆言御史謀去將相削陛下
爪牙志欲如何昇等論辨不已罷沆為觀文殿大學士工部尚
書知應天府徙陳州卒年六十六贈左僕射兼侍中仁宗賜以
挽詩為篆神道日思賢之碑平生長于吏事性豪率少儀矩多
任智數善刺探權近過失陰持之以軒輊取事論者以此少之
子三瑾琢瑄 瑾字元忠初因辭賜溫成閣中金器請瑾試學
士院遂帖職復登進士為館閣校勘知制誥張瓌草沆詞語涉
譏貶瑾泣涕不食詣宰相訴書命雖改坐衰服入公門罷職喪
除不就官丐守墳墓王素為請詔復職遷集賢校理通判睦州

為淮南運副名修起居注加史館修撰河北運使拜天章閣待
制知瀛州徙廣州與密院論戍兵不合改處州都監楊從先擅
遣其子懋糾諸縣巡檢兵瑾怒責之為懋所訴遂罷踰年復待
制知江州歷福興秦州成德軍卒瑾有操尚所治以能稱然御
下苛嚴少縱舍好面折人短以故多致訾怨

曾公亮字明仲泉州晉江人登進士知會稽縣鏡湖旁民田患
溢為立斗門泄水入曹娥江民受其利後坐買田境中謫監湖
州酒尋遷國子直講改諸王府侍講歲滿獻所為文授集賢校
理天章閣待制修起居注故事不改服仁宗而賜金紫以寵儒
臣進知制誥兼史館修撰為翰林學士判三班院院吏叢狠非
賊不行兼貴游子弟倚勢請謁公亮掇前後章程視以從事吏
不能欺俄除端明殿學士知鄭州為政有聲盜悉竄他境道不

拾遺復名為學士知開封府未幾擢給事中參知政事嘉祐五
年改禮部侍郎除樞密使六年轉吏部侍郎同中書門下平章
事集賢殿大學士性既明練久歷國家故事習知臺閣典憲首
相韓琦每咨訪焉遂共定建儲大議密州民強盜曠銀多抵死
駸以銀乃禁物取之雖彊與盜民家物異遂議比劫禁物法自
是無死者契丹縱漁界河數通鹽舟吏恐較之生事不敢禁奏
言萌芽不禁後將奈何屬雄州趙滋勇而有謀使諭以旨意邊
害訖息英宗立為中書侍郎兼禮部尚書值上不豫遣使至不
能見命侍宴于館使者不肯赴責以錫宴不赴是不虔君命乃
就席神宗立轉門下侍郎兼吏部尚書封英國公熙寧二年進
昭文館大學士封魯國公以老避位三年九月拜司空兼侍中
河陽三城節度罷為集禧觀使明年起判永興軍務以鎮靜裁

抑冗費先是有叛卒餘黨越陝以西州縣皆警備閱義勇益邊
兵人情驟然公亮次第奏罷之營卒揚言怨滅削謀以上元夜
結外兵爲亂亦不爲動歲餘還京以太保致仕元豐元年薨年
八十帝臨哭輟朝贈太師中書令謚宣靖配享英宗廟庭神宗
象神道曰兩朝顧命定策亞勳之碑公亮方厚莊重深沉周密
平居謹繩墨蹈規矩然性吝嗇殖貨至鉅萬帝嘗以方張安世
初薦王安石及同輔政知上方向之陰爲子孫計凡更張庶事
一切聽順而外若不與之者安石德其助已故引擢其子孝寬
至政地以報之蘇軾責以不能救正答云上與介甫如一人此
乃天也人以是譏其持祿保寵變法之禍不能辭其責云 孝
寬字令綽初蔭知桐城縣除秘閣修撰提點開封府界鎮縣保
甲法行民驚恐籍爲兵知府韓維乞候農隙行之孝寬乃榜屬

縣捕告者民不敢訴維之言遂不行入知審官東院遷樞密都
承旨直學士簽書樞密院事連徙鎮卒年六十六 孝廣字仲
錫元豐末爲北外都水丞大臣議復河道名問言不可出判保
州除京西運判入爲水部員外河決內黃詔行視遂䟽蘇村鑿
鉅野導河北流紓澶滑深瀛之害洛水復溢侵齧北岸孝廣按
河隄得廢渡口遺迹昔人所以殺水勢者卽日濬決之累石爲
防自是無水患御史論與胡安國鄒浩善奪職知饒州歷成德
軍知太原入爲戶部尚書坐缺錢帛出知杭州卒年六十贈正
議大夫 孝蘊字處善紹聖中管幹發運司建言楊之瓜洲潤
之京口常之犇牛易堰爲牖以便漕運公私便之提舉兩浙常
平政運判知臨江軍名爲左司員外郎遷起居舍人以顯謨閣
待制知歙州方臘起分兵守扼塞敕郡內無得奔擾稍恃以安

改杭州直城已破單車至城下俄克復論功進顯謨閣直學士
 加龍圖閣學士卒年六十五贈通議大夫從子孝序字逢原
 蔭補將作監簿監海安鹽倉累官環慶經略安撫使與蔡京議
 事不合又疏言方今結糴俵糴之法盡括民財充數京益怒嫉
 御史宋聖寵劾其私事追逮削籍竄嶺表京罷授顯謨閣待制
 知潭州復論從事與吳居厚不合落職知袁州尋復職再知潭
 改道州從人叛乘高恃險機毒矢下官軍不得前乃於兩山間
 作巨木橫累以守夜遣驍銳攀援而上大兵繼進破之賊平歷
 顯謨龍圖閣直學士知青州繕修城池訓練士卒儲峙金穀有
 數年之備金人不敢犯南渡歷除徽猷閣延康殿二學士
 行在許青民借留會臨胸土兵趙晟聚眾為亂將官王遺字
 失利懼罪反以言撼敗卒斬關入城孝序據廳事遺字

與其子宣教郎許皆遇害年七十九贈五官為光祿大夫諡威
 愍許承議郎城無主遂陷知臨淄陸有常率民兵拒守死于陣
 贈朝散郎知益都張侃于乘縣丞于興宗亦死之贈二官各官
 其家并子

開日仁宗末年内寵外寇旋得互失尚不改舊厥勢漸移
 寵利斯購

